

KOYEBA MOKOLO NA BINO PE NSANGO NA YANGO



Mbote, baninga. Totikala ndenge totelemi mwa moke.

Nzambe molingami, lokola kati na yíkíyiki oyo ya bomoi, topemi mwa moke na mwa miniti to ngonga mobimba oyo ekolanda, to ntango boni, oyo Opesi biso, mpo na kopesa Yo masanzoli pe nkembo, koteya Liloba na Yo, koyeba Yo malamau koleka, yango wana toyangani na ntongo oyo. Totondi Yo, e Nzambe, mpamba te bato bazali oyo babelemi pe bamilengeli ete báya koyoka. Batali te lolenge na makambo pe ntango oyo tozali kobika kati na yango, bazali kaka kondima. Pe totondi Yo mpo na bango.

² E Nzambe, tozali kozongisa matondi epai na Yo mpo na nguya na Yo monene ya kobikisa babeli, bilaka ya Liloba na Yo. Ndenge mitema na biso ezali kopela ntango tozali koyoka matatoli oyo! Na mpasi ya ndenge na ndenge oyo ekómeli bana na moto! Yo, ná ngolu pe nguya na Yo, pe na elaka na Yo, Obikisi nzoto na bango. Pe bazali awa, kotatola, kopesa Nzambe masanzoli. Totondi Yo mpo na yango.

Pe sikawa, lelo, tokoka koyoka Liteya oyo Obongisi mpo na biso mpo na ngonga oyo. Wana tokotanga na Liloba na Yo, Ópesa biso ntina ya oyo tokotanga. Tika ete mokano na Yo esalema kati na nyonso, mpamba te tosenge yango na Nkombo na Yesu. Amen.

Bokoki kofanda.

³ Ezali litomba kozala awa na ntongo oyo. Nazali na esengo monene mpo na bino nyonso. Ndeko Woods, Ndeko Roy Roberson, bandeko mosusu mingi, basali mosala na bosembo nyonso mikolo mibale oyo eleki, mpo na kotia malili na ndako oyo, mpo na likambo oyo, mpamba te lomingo eleki bamonaki ndenge bomonaki mpasi. Bazalaki na mwa mosolo na ebombelo ya lingomba, babandaki mosala pe batiaki yango na mosala mpo bozala malamau, na mosolo oyo bopesaki makabo, mpo bokoka kofanda, wana bozali koyoka Liteya. Malili ezali mingi lelo koleka mokolo wana. Na bongo tozongisi matondi epai na Nzambe, pe epai na bino, mpo na libaku oyo.

⁴ Esengo...Na ntongo oyo, Ndeko Roy Borders alingaki lokola afanda kuna na suka. Bongo nayebisaki ye ete azua kiti na ye pe afanda awa elongo na batei oyo, kasi alingaki te. Ndenge bino nyonso boyebi, Ndeko Borders azali ntoma na biso na esika ya mosala. Tosepeli mingi kozala na Ndeko Borders awa, ná batei mingi mosusu pe baninga.

⁵ Na kati na póso na—nakanisaka, pe nalobaka: “Ntango nakokóma kuna, mokolo ya lomingo, nakotalisa motei moko na moko pe moto moko na moko.” Na nsima soki tokómi awa, tomemamaka mingi kati na Liteya na lolenge ete tobosanaka pene makambo nyonso, oyo ezalaki.

⁶ Sikawa, nasengeli kozonga na Arizona. Nasengeli kozonga mokolo mwa mosala moko, oyo kuna, kozonga na Tucson, komema bana kuna mpo na kelasi. Nsima na yango nde nakozonga lisusu awa. Mwasi na ngai asengeli kokóma kuna mwa liboso, mpo na kobanda. . . mpo na kokomisa bana, póso mibale liboso ete kelasi ebanda. Pe ngai, na nsima, nakozonga awa mpo na mwa ntango.

⁷ Sikawa oyo nde ntango na ngai ya loyi. Ndenge boyebi, natei uta sanza ya zomi na mibale; sanza ya liboso, ya mibale, ya misato, ya minei, ya mitano, ya motoba, pe ya nsambo. Sikawa, soki Nzambe alingi, pe ete mbela moko ya nokinoki ezali te, oyo nde eleko oyo na—na—napemaka, nazuaka loyi. Nakendeke bokila. Pe na . . .

⁸ Nde soki Nkolo abengi ngai mpo na likambo mosusu, makambo oyo wana natangaka yango te. Nzambe azalaka ntango nyonso na esika ya liboso. Ngai nalingaka ete Azala na esika ya liboso, bino pe bolingaka ete Azala na esika ya liboso. Kasi nde soki mbela moko ezali te, pe soki yango ezali mokano na Ye, yango nde nasengeli kosala sikawa na mwa basanza ezali koya; ezali nde kokende bokila, sikawa, mpo nápema. Na . . .

⁹ Boyebi te, mokili bakososola ata moke te, mpasi oyo nasengelaka komona. Bomoni? Ezali mpenza motó mpasi. Kokamwa te soki Nkolo alobaki na bayekoli na Ye, ntango Azalaki kotambola na bango: “Bóyáka na bino epai na lisobe pe bópéma moke.” Bomoni? Nazali kososola yango koleka, mokolo na mokolo, pe koleka ndenge mikolo na ngai ezali kobakisama na mokili, bomoni. Ntango moto akómi konuna, akososola yango. Boyoki ndenge mokengeli na biso pe alobi “amen” na yango. Ye, biso, tosololi ete tozali lisusu bilenge te nsima na biso kolekisa mibu ntuku mitano. Sikawa tosengeli na mwa ntango.

¹⁰ Tozali kozongisa matondi mingi mpo na matatoli oyo touti koyoka. Mwasi na ngai azalaki epai ya Madame Wood, lobi, ntango bato oyo bautaki na Alabama bakómaki, na esika moko boye kuna, pe bazalaki koloba na ntina na makambo minene oyo Nkolo asalaki na liyangani kuna, ndenge bana mike babikisamaki, pe makambo ndenge na ndenge. Pe makambo ebele oyo, ólalá, ekosenga mpenza ntango molai mpo—mpo na kosilisa koloba yango.

¹¹ Nsima nasengeli pe komikanisela ete. . . Nakanisi ete bato bayebisi ngai ete Ndeko mwasi Larson eleki lomingo mibale azali awa ná bebé moke moko. Nayebi te, kasi nakanisi ete balobaki ete ezali nde nkoko na ye, mbala mosusu, mpo na

kopambolama, auti na ye na Chicago. Mwasi oyo azalaka na boboto mingi epai na biso, pe tosepelaka na ye. Pe amemi bebé moke uta na Chicago, mpo na kopambolama. Kutu, azui mwa kokoso mpo na koya na ye, nakanisi, mpo na kopambolama, kasi asepeleli kaka ete mwana oyo apambolama na Nkolo. Boye soki Ndeko mwasi Larson alingi, wana nazali koloba, akoki koya na bebé yango awa mpo na kopambolama.

¹² Lisusu, mbala mosusu, wana azali komilengela, na—nalingi koloba ete oyo nde Liteya eleki makasi oyo nabundi mpenza mpo na kolengela, kino lobi na mpokwa. Póso oyo mobimba, nazalaki kokota na biró, komeka kofanda pembeni nsima na bato kobenga ngai pe nyonso, mpo—mpo na koluka kozua eloko moko na makanisi na ngai mpo na ngonga oyo. Bongo ntango nazalaki kokota kuna, na—nazalaki ata kokoka te. . . Makanisi na ngai ezalaki na eloko te. Bongo, lobi, nakitaki na eteni ya nse na mabele. Nakanisaki ete molunge elekaki mingi, boye nakitaki na eteni ya nse na mabele, nafandaki kuna. Namekaki kozua Biblia na ngai mpo natanga, pe mpongi ezuaiki ngai. Na nsima nalamuki pe nameli mai, nameki kominingisa, nabimi libanda pe natamboli nzizinganza, nafandi na bibuteli.

¹³ Moto moko ayaki wana pe akutaki ngai nalongoli simisi, nafandi na bibuteli; molunge ezalaki makasi mpenza. Apepaki ngai mbote. Nayebaki te soki apepaki mbote. . . Moto moko, ekokaki kozala moto ya engumba na biso awa, to ekokaki kozala moto ya losambo na biso, apepaki ngai mbote. Pe ma—makanisi na ngai ekendeki mosika mpenza, na—nabwakaki kaka miso na motuka yango, pe elekaki. Napepaki pe mbote.

¹⁴ Lobi na mpokwa namataki na motuka pe nakendeki na ngambo ya Charlestown, nazalaki koluka kozua eloko moko. Emonanaki ete Nkolo alingaki koyebisa ngai likambo moko, kasi na. . . Satana azalaki koluka kokangela ngai nzela, mpo ápekisa ngai kosala yango. Boye namilobelaki: “Ee, soki asali bongo, nakokoba koumela, nakokoba kaka kozela, kobeta makasi na ekuke kino ete Afungola.” Na bongo eleki kaka mwa ntango moke, to mwa moke mpenza nsima na ngonga ya nsambo na ntongo ya lelo, nalamukaki na ntongo makasi.

¹⁵ Lobi, nazalaki na mwa bokono, nazalaki komeka. . . Naliaki masangu oyo elingaki mpenza libumu na ngai te, lokola ezalaki na móto makasi, pe na—nazalaki koluka kobika na yango. Pe—pe na ntongo ya lelo, pene na ngonga ya mwambe, nakweyaki na Likomi oyo ekamwisaki ngai. Natalaki Likomi yango lisusu, pe Ekamwisaki ngai lisusu. Pe nabandaki kolandela Yango kati na Makomi, bongo nauti kosilisa eleki mwa miniti moke. Boye ekoki kozala ete Nkolo azali na Nsango mpo na biso, na ntongo oyo, oyo Satana azalaki komeka kopekisa ete ékómela biso te.

Okoki koya na mwana yango awa, Ndeko mwasi Larson? [Ndeko Branham apamboli bebé moko. Maloba mazangi na

eteni oyo ya bande—N.D.E.] Nzambe azala na bango pe asunga bango.

¹⁶ Sikawa naumisaki bino, lomingo eleki, mikolo mibale, pe nakanisi. . .to, mayangani mibale, ya ntongo pe ya mpokwa, ezali mpasi mpo na bino. Na sosolaki ete e. . .Bamosusu kati na bino basengeli kosala mobembo molai mpenza, kozanga mokolo mobimba ya mosala, pe bongo na bongo. Boye ata soki tokokende mokolo ya lomingo, ya mosala moko oyo kuna, nakoyebisa ete losambo ekozala na lomingo ekoya, soki Nkolo alingi, bomoni, longola kaka soki liyangani bakolinga kotikala lisusu na mpokwa oyo. Bomoni, yango, yango etali. . .Bozali mpenza bato ebele!

Bato boni bakosepela ete ezala lelo na mpokwa, botombola maboko, ete tózala na liyangani lelo na mpokwa? Sikawa, boni bakosepela ete esalema lomingo ekoya? Botombola maboko mpo na mbala ya nsima? Ólalá, ezali penepene. Ha! [Moto moko alobi: “Bakokani na motango, ndeko!”—N.D.E.] Olobi nini? [“Ezala mbala nyonso mibale.”] Ha! [Ndeko Ben Bryant alobi: “Pe, na mpokwa oyo, esalema nyonso mibale.” Boni, boni, Ben! [Ndeko Branham aseki.]

¹⁷ Nazuaki Liteya oyo na ntongo oyo, ezali molai, kasi na—nayebi mpenza te ndenge nini. . .Pe nayebi ete nasungaki ete mibeko na Lingomba esalema, kasi na kati kuna, soki botali malamú, nalobaki: “Longola bobele soki nazali kosala babande.” Bomoni? Boye, oyo ezali kotiana na bande. Iyo. Na bongo ntango mosusu tokomeka kozonga awa mbala nyonso mibale, lelo na mpokwa ná lomingo ekoya, na ntango wana, soki Nkolo alingi, bomoni. Sikawa, soki boyoki nsango na póso oyo te, na bongo boya lomingo ekoya.

¹⁸ Nalingaka te kobengisa bino awa mbala mibale boye, kasi nazali komona ete totikali kaka na mwa ntango moke. Bomikanisela naino, soki ntango ekokoba kozala, tokozala na litomba oyo ntango molai te. Bomoni? Bomikanisela, likambo moko ekosalema. To mibeko ekopekisa biso, to Satana akokota kati na bino pe akopanza bino. Esalemaka ntango nyonso bongo. Bomoni? Likambo moko ekosalema, na bongo tosepelaka na miniti moko na moko oyo tozalaka elongo.

¹⁹ Na bongo mpo na baoyo basengeli sikawa kozonga na bandako, na mpokwa oyo, ekozala lokola ezalaki na mpokwa ya lomingo eleki, nateyaki kaka mwa—mwa Liteya mokuse. Na bongo, bino, soki bolingi kozua yango na bande, ee, na ntembe te, tokotindela bino bande yango soki bosengeli kozonga na bandako. To, soki te, nakoteya na mpokwa oyo, soki Nkolo alingi.

²⁰ Nazalaki na mwa nkoma lobi, to—to lobi oyo kuna, mwa Liteya oyo nakomaki uta na likanisi ya likambo moko, pe esalémá kala. Nzoka nde, Mateya mibale ezali kuna. Nazali

kotatabana mwa moke kati na yango mibale, moko na yango ezali: “Libulu litobwami,” to pe: “Kolona mopepe pe kobuka ekumbaki,” Liteya moko ya kopalanganisa Nsango Malamu. Na ntongo oyo, ezali malakisi. Na bongo, na mpokwa, nakoteya to likolo na “Kolona mopepe pe kobuka ekumbaki,” to pe “Libulu litobwami.”

²¹ Pe, na ntongo oyo, nalingi sikawa kotanga na Makomi Mosantu.

Bozali komiyoka malamu? Boloba: “Amen.” [Losambo balobi: “Amen.”—N.D.E.] Malamu.

Sikawa nalingi ete, na ba-Biblia na bino, bofungola elongo na ngai na Buku ya Hosea, bino oyo bolingi kotanga. Totanga mwa biteni na mokapo ya 6 ya Buku ya Hosea, mosakoli.

Totelema.

²² Nzambe molingami, tobongi te mpo na kozua Buku oyo na maboko na biso, mpamba te totangi na Makomi ete moto ata moko te na Likolo to na mabele, to na nse na mabele, abongaki to azalaki ata na makoki ya kokamata Buku, to ata ya kotala Yango. Oh, pe Moko ayaki oyo azalaki lokola Mwana-mpate oyo autaki kobomama; Ye nde akamataki Buku yango, mpamba te Abongaki, pe Afungolaki Bilembo na yango. Pe tozali kotalela Ye na ntongo oyo ete Amonisa ntina ya makambo oyo ekomami na Buku, mpo ete ezali Buku ya Lisiko. Oyo nyonso esikolama ekomami kuna na kati. Tika ete tomona esika na biso, na ntongo oyo, kati na eleko oyo tozali kobika. Mpamba te tosengi yango na Nkombo na Yesu. Amen.

Yaka sikawa tobutwa epai na Yawe, zambi apasoli biso nde akobikisa biso; asili abeti biso nde akobikisa biso mpota.

Nsima na mikolo mibale akoyamba biso lisusu pe na mokolo na misato akosekwisa biso pe tokobika na liboso na elongi na ye.

Toyeba, tobilaka koyeba Yawe; akobima solo lokola ekobimaka ntongontongo; akobimela biso lokola mbula, lokola mbula na ebandeli na elanga oyo ekopolisaka mabele.

E Efelaima, nakosalela yo nini? E Yuda, nakosalela yo nini? Zambi boyengebene na bino ezali lokola londende na ntongo, lokola mamwe oyo ekolimwa mbangombango.

Na ntina yango, nabeti bango na nzela na basakoli, nabomi bango na nzela na maloba na monoko na ngai. Kosambisa na yo ezali lokola moi mokopalanganaka.

Mpo ete nalingi boboto, mbeka te; nalingi boyebi koyeba Nzambe liboso na makabo matumbami.

Kasi lokola Adama, basopi kondimana basili—basili basaleli ngai na bokosi.

Gilada azali mboka na basaleli na mabe, abebisami na makila.

Lokola bibolo na bayibi balambeli moto, bongo ebolo na banganga bazali koboma bato na nzela na Sekeme, pe . . . bamipesi na masumu.

Namoni likambo na mabe mingi kati na ndako na Yisalaele, pite ezali kuna na Efelaima, Yisalaele abebisami.

E Yuda, ntango na kobuka mbuma etindameli yo, na yango nakokalambisa bakangami na bato na ngai.

23 Nkolo Yesu, na nzela na Molimo Mosantu, bimisa uta na Oyo ntina oyo esengeli, wana tozali kokoba kotalela Yo. Na Nkombo na Yesu. Amen.

24 Sikawa, liteya na ngai na ntango oyo ezali: *Koyeba Mokolo Na Bino Pe Nsango Na Yango.*

Tomonaki uta na malakisi ya lomingo eleki, ndenge toteyaki, *Eyenga ya Bakelelo*. Pe nalingi kobenda bokebi na bino, sikawa, likolo na ntango—ntango na Yisalaele kati na saa ya Nzambe.

25 Lelo tozali koyekola liteya ya eteyelo ya lomingo, mpo nalingi ete bososola pe boyeba eleko oyo tozali kobika kati na yango. Tokómi mpenza pene na suka, ndenge bozali komona. Bongo, na nzela na yango, bokosengela koyeba ngonga pe ntango mpenza, elembo pe Nsango oyo bosengeli koyamba.

26 Sikawa, ndenge tobandaki lomingo eleki . . . Tozalaki koloba ete tokoteya likolo na Bakelelo, Bakelelo Nsambo ya suka kati na Biblia. Pe ngai, kati na ngai, nakanisaki ete ekofungwama mpenza lokola Bilembo. Kasi namoni ete na moko na moko na bofungwami oyo, likambo monene ezalaki kosalema.

Ntango toteyaki *Bileko Nsambo Na Lingomba*, ezalaki mpenza malamuni mingi na lolenge ete Molimo Mosantu Ye moko akitaki kati na biso pe atalaki yango, bakomákí yango na bazulunale, bapalanganisaki nsango yango na ekólo mobimba, etalisamaki na sanza na likolo, pe etalisamaki polele epai na biso, bapóso pe basanza liboso ete esalema, kaka ndenge elingaki kozala, na ndenge ebongi. Awa na ndakonzambe Atalisaki yango. Awa na . . . kati na ntango, Atalisaki yango. Na sanza pe na moi, Atalisaki yango. Pe na lolenge mabota ekómi na eleko oyo, Atalisi yango; ndenge bokitani ya Roma elongwaki pe ezongaki na Palestina, balobaka ete ye nde pápa ya liboso oyo azongaki nsima na Petelo (ndenge balobaka) oyo balobaka ete azalaki pápa. Bongo, ezalaki mpenza likambo monene!

27 Nsima, tomoni, liboso na Bilembo Nsambo oyo ebombaki mabombami nyonso.

Wana ngai nazalaki koyeba te eloko nazalaki koyema na etánda, na ntina na Bileko na Lingomba. Nayebaki ata moke te. Nzambe ayebi. Nayemaki yango kaka na nzela na emononeli. Nayebaki te ete Nzambe, nsima na mobu moko na sanza motoba, alingaki kotatola yango na likolo, na nzela na sanza, pe kosala ete bakoma yango na bazulunale ya ekólo mobimba. Nayebaki yango te. Nayebaki te ete sanza ekoínda na ndenge ya kokamwisa, mpo na kotalisa Eleko oyo ya Laodikia.

²⁸ Nzoka nde, na bazulunale, bokokuta kaka bileko motoba. Ezali mpo ete eleko na Laodikia eyindaki mpenza mobimba. Pe soki bokomona ndimbola na yango kati na molimo, ndenge Nzambe atandaki yango na likolo. Ntango natandaki yango awa na nse, natikaki mwa esika moke, ndenge bozali komona, mpenza mwa litono moke ya pole. Wana ezalaki mwa moke liboso ete Baponami mpenza babengama mpo na kotika mokili, yango wana natiaki yango wana na eleko ya nsambo. Kasi ntango Nzambe atiaki yango na likolo, eyindaki mpenza mobimba, elingi koloba mbala mosusu ete moto ya suka asili kobengama uta na Eleko yango ya Laodikia. Toyebi te. Liteya mobimba ekoki koteyama mpo na yango.

²⁹ Sikawa botala lisusu, liboso na—na Bilembo Nsambo, kutu nazalaki ata na likanisi te ete ezalaki bongo.

Awa na losambo, Alobelaki yango, pe Atindaki ngai na Tucson, Arizona, mpo na koyebisa bino nyonso oyo elingaki kosalema. Pe bato bazali awa, lelo, oyo bazalaki wana pe bamonaki yango kosalema mpenza ndenge elobamaki awa ete ekosalema: “Banje nsambo balingaki koya.” Na nsima mikanda epanzaki yango, ná bazulunale, na mboka mobimba: “Libungutulu ya Pole ya kokamwisa na lolenge ya piramide,” kaka ndenge nayemaki yango awa pe nalakisaki bino. Etombwanaki uta na esika oyo Banje yango bazalaki, pe emataki na mosanda ya mile ntuku misato [kilometele ntuku minei na mwambe—N.D.T.], pe ezalaki na bonene ya mile ntuku mibale na nsambo [kilometele ntuku minei na nsambo]; to kútu mosanda ya mile ntuku mibale na nsambo [kilomete ntuku minei na misato], pe bonene ya mile ntuku misato [kilometele ntuku minei na mwambe], nayebi lisusu yango malamau te. Pe emonanaki na bituka bipai na bipai, na likolo mpenza ya Tucson, Arizona, mpenza na esika esalemaki, kaka na ntango yango.

³⁰ Bomoni, Bi—Biblia, Nzambe azali kaka te. . . Oyo ezali moto te nde azali komeka ko—kopesa bino eloko na makasi, kasi nde mpo na komonisela bino ndimbola mpenza ya eleko oyo kati na molimo.

³¹ Na nsima, Liteya oyo elandaki, nde oyo efungolaki Bilembo Nsambo, oyo ekangolaki mabombami nyonso ya Biblia, Malakisi pe bongo na bongo. Oyo mokili ezali kobundisa makasi mikolo

oyo, ezali kobundisa Yango pe koloba ete Ezali lokuta, *boye na boye*.

³² Mokolo wana awa na Arizona, bazalaki kotongatonga biteni ya ba-bande, mpo baluka kolobisa ngai makambo oyo nalobaki te. Bomikanisela naino emononeli oyo etali likanisi ya Arizona! Biblia elobi: “Mbele Eleki malamumu mpenza mpo na yo ete libanga etiana na nkingo na yo.” Pe likambo mosusu, ete: “Moto soko nani,” ázala motei to nani, “akolongola Liloba moko uta na Yango, to akobakisa liloba moko likolo na Yango!” Bato oyo bazali kobakisa ndimbola na bango moko likolo na Liloba ndenge Epesami, koluka kolobisa Yango likambo oyo ngai nalobaki te, pe, ezali Liloba na ngai te; Ezali Liloba na Ye. “Oyo akobakisa, to akolongola!”

³³ Lisusu, kati na emononeli yango, tomonaki ndenge basakoli oyo bakitaki pwasa, ndenge nalimbolelaki bino, nabanzi, na lomongo moko, eleki mwa bapóso. Nyonso wana ekokokisama. Nalobaki: “Botikala mosika na yango.” Na ntango nyonso oyo ngai nde nazali kobunda, Nzambe akoki kobunda te. Kasi totikela Ye yango. Ye Moto Azali kotala likambo yango. Bomoni?

³⁴ Sikawa tomonaki, lomongo eleki, ezalaki . . . tozalaki koteya likolo na biyenga. Eyenga ya pantekote ezalaki. Na kati ya eyenga ya pantekote ná eyenga ya bakelelo, ntango molai ezalaki koleka; mpenza mikolo ntuku mitano na kati na pantekote pe eyenga ya bakelelo. Pe mikolo ntuku mitano, oyo, *pantekote* elingi koloba “ntuku mitano.” Ezalaki koningisama ya liboke, to bokoti- . . . Bazalaki komema mbuma na liboso ya elanga. Pe tomoni ete kuna ezalaki etaliseli, ná mbuma na liboso ya mokili, ezalaki kotalisa mbuma na liboso ya Molimo Mosantu oyo esengelaki kosopana likolo na bato.

Lisusu, tomoni, ete mikolo ntuku mitano yango ezalaki mpo na bato na Mabota, mpamba te, “Nzambe abengaki libota moko uta na Mabota mpo ete ezua Nkombo na Ye”, eyenga ya pantekote. Pe tozali koleka kati na eyenga molai oyo ya pantekote.

³⁵ Sikawa, solo, mikolo ntuku mitano oyo, ezalaki kopesa mpenza sabata nsambo. Pe sabata nsambo ezalaki kotalisa Bileko Nsambo ya Lingomba, oyo esengelaki kobengama na ntango na eyenga ya pantekote, ya Pantekote, mpo na kobenga libota moko uta na Mabota mpo ete ezua Nkombo na Ye.

Bongo, na suka ya sabata nsambo yango, oyo esili koleka, Mokolo ya Bolimbisi esengelaki kozala, oyo ezalaki Bakelelo Nsambo. Pe Bakelelo Nsambo ezalaki mpo na kosakola mokolo ya matanga, kozongela Mbeka, to, Bolimbisi. Boye tomoni ete, Yisalaele, Bakelelo Nsambo yango ezalaki kaka mpo na Yisalaele.

³⁶ Pe, lisusu, ntina Apesaki ngai nzela te ete nateya Bakelelo Nsambo yango. Kutu nabelemaki ata ete naye bisha yango, bisika

ebongisamaki pe nyonso na ntina ete tokende kuna, mpo na koteya Bakelelo Nsambo. Pe nalobaki: “Eloko moko ezali kotungisa ngai mingi,” nalobaki bongo. Tokobaki kosala, Billy ná biso nyonso, tomekaki kolengela nyonso na ntina ete na póso oyo ezali koya ndako oyo ezala na moepepe ya malili, mpo na Bakelelo Nsambo; lokola tozalaki na mikolo zomi, to, mikolo mwambe, oyo tozuaki ndako monene ya eteyelo. Kasi Molimo Mosantu apesaki ngai nzela te ete nasala yango, na ntina moko boye, pe namitunaki mpo na nini.

Pe ntango nabandaki kobondela. Nayebisaki mwasi na ngai: “Nalingi kobanda.” Na bosembo nyonso nafukamaki liboso na Nzambe, mpo na kobondela. Pe Amonisaki ngai ete Bakelelo Nsambo oyo eyulaki na ntango na Elembo ya Motoba, pe nasilaki koteya yango, na ndenge ya bonzambe. Bomoni, ezali loboko na Nzambe, na mobimba na yango. Ezali mpo na Yisalaele, pe tolobelaki yango na ntango na Elembo ya Motoba; mpo na bino nyonso oyo bozuaki yango, ndenge Bayuda banyokwamaki.

³⁷ Ntango na Mabota ezalaki kati na ntango na eyenga oyo ya pantekote.

Bakelelo, na ntango na . . .nyonso eyulamaki na ntango na Elembo ya Motoba. Tolobelaki yango lomingo eleki, na ntango na eyenga na bakelelo, soki bino nyonso bolingi kozua yango. Ezalaki mpo na nini? Mpo na kopusa Bayuda, ete balongwa bisika nyonso na mokili, bazonga na ekólo na bango. Esengeli ete bazala kuna. Pe kofungwama na Bilembo, na ntango na Elembo ya Motoba, pe na ntango na . . . Bakelelo Nsambo oyo eyulaki kati na—na Elembo ya Motoba.

³⁸ Sikawa, Nsango ya mwanje na nsambo ezali mpo na kofungola libombami ya Bilembo, kobenga basali ya ngonga ya zomi na moko ya Mabota ete bazua lifuti yango moko oyo basali ya ngonga ya liboso bazuaki. Bomoni?

Bongo, Yesu ateyaki yango. Alobaki ete bato bakendeki kosala na elanga. Bazuamaki na mosala. Na ntango yango, na ntongontongo, bafutamaki mpo na—na—na ngonga moko, lopata mpo na mokolo moko. Bongo na nzánga, moto mosusu ayaki pe abandaki mosala. Pe na nsima, na ngonga ya zomi na moko, yango nde ngonga ya suka ya moi, moto moko ayaki pe azuaki lifuti yango moko oyo bazuaki na ngonga ya liboso ya moi; ngonga ya suka.

³⁹ Ebongi be mpenza, batíndami ya ngonga ya liboso elongo na Liloba, ná Nsango Malamu, ná Solo, bayaki na Mokolo na Pantekote. Bongo, eleko ya molili eyaki oyo epekisaki bango ete baya. Na nsima, na katikati na mokolo, Luther, ná Wesley, ná bamosusu bayaki. Pe na nsima esengeli ete Nsango ya ntango na mpokwa ezala, mpo ete bazua kaka elóko oyo bazuaki na ebandeli. Nsango ya ntango na mpokwa ezali mpo na kobongisa lisusu, mpo na kozongisa lisusu kaka elóko yango.

⁴⁰ Bomikanisela emononeli ya póso eleki, ntango Mwasi na libala ayaki mpo na . . . kotalisama na ye. Elenge Mwasi na libala ayaki, bonzenga, na emononeli. Pe ngai, nazalaki na likanisi na yango te; nafandaki kaka wana pe nazalaki kotala libanda. Pe Mwasi na libala ayaki. Nayokaki Mongongo moko pembeni na ngai, elobaki: “Tala kotalisama ya Mwasi na libala.” Pe Alekaki. Namonaki Ye, ndenge Azalaki, bonzenga mingi, kitoko, elenge. Azalaki kotambola kaka ndenge bato batambolaka, defile te; kobwaka makolo kaka na ndenge ya—ya basi, ndenge batambolaka nzoto petepete, na ndenge ya basi ya kilo. Azalaki kotambola nde bongo, Azalaki koya na loboko na ngai ya mwasi na ngambo *oyo*, pe Alimwaki na miso na ngai.

⁴¹ Na nsima Atalisaki ngai na ngambo ya mobali, pe Atalisaki ngai lingomba moko na moko ndenge bauti kati na bileko. Pe, oh, bosoto ya ndenge wana! Pe oyo ya suka ezalaki eleko ya lingomba ya mikolo oyo ya suka, oyo ezalaki kokambama na mwasi ndoki. Balataki mpenza mabe, pe ezalaki mpenza mbindo na komona bango! Bazalaki kotambola na mondule ya twist pe rock-and-roll. Basi yango bazalaki kobukabuka nzoto, wana basimbaki kaka lokasa ya mokanda, ya langi ya gris, langi ya bilongi mibale, ya mab- . . . Langi ya gris ezali katikati na mpembe pe moindo, bongo ezali langi oyo eyebi kokosa. Gris ezali mpembe te pe moindo te. Ezali langi oyo eyebi kokosa. Lokasa lokola ya gris, oyo batiaki liboso na bango, ná bajupe ya mpeko ya malenda, basimbaki yango liboso na bango, pe bazalaki mpenza ntólo polele. Pe bazalaki kotambola na . . . to na mondule, to na kobukabuka nzoto, koboma nzoto na miziki yango, wana bazalaki kobeleva. Pe Alobaki: “Tala lingomba.”

⁴² Pe ntango elekaki pembeni na ngai, motema na ngai elingaki kokatana. Namilobelaki: “Yango nde eloko bazali komeka kopesa epai na Klisto, lokola Mwasi na libala? Na makasi pe makambo nyonso oyo bato basali, mpo na komeka kobimisa Mwasi na libala mpo na Klisto; pe mwasi na pite, ya nsoni, ya bosoto, ya mbindo boye ázala Mwasi na libala na Klisto?” Epesaki ngai mpasi na motema.

⁴³ Pe ntango azalaki koleka, nsima na ye. . . Ntango akómaki liboso na esika totelemaki, atiaki lokasa yango liboso na ye, azalaki kobukabuka nzoto, kodendadenda, kokende epai, kozonga epai, ntango azalaki koleka, lokola mabina ya sika oyo bazali na yango mikolo oyo, azalaki kosala makambo ya nsoni wana azalaki kokoba kotambola.

⁴⁴ Nazali na mokumba ya makambo oyo te. Nakoki kaka koloba oyo namonaki. Pe Nzambe azali Mosambisi na ngai, kasi yango ezalaki nde lingomba ya Amerika.

⁴⁵ Sikawa, ntango azalaki koleka, mokongo na ye mobimba ezipanaki ata te. Na bongo, ntango azalaki koleka, nayokaki lokola nasenzwa pe lokola nabeli.

46 Bongo Alobaki: “Mwasi na libala akoya komonana lisusu.” Pe tala, Mwasi na libala ayaki na nsima na ye, Mwasi na libala mpenza lokola oyo alekaki na ebandeli. Bongo motema na ngai etondaki na esengo, na koyeba ete Mwasi na libala akozala. Pe Akosalema bobele na eloko yango, pe Akolatisama bobele na eloko yango, lokola Oyo azalaki na ebandeli. Asengeli kobengama.

Pe nayebi ete ezali Solo. Soki ezali solo te, boye bimononeli nyonso oyo nasila kozua ezalaki ya lokuta. Pe moto nyonso ayebi, ete, naino Alobela biso ata likambo moko te bongo ezanga kozala Solo. Ekokisámá, mpenza . . .

47 Pe bozali bongo komona mbindo ya lingomba ya mikolo oyo, oyo azali komibenga “lingomba”?

48 Ndenge moto moko alobaki mokolo wana; Ndeko Ruddell, ndeko na ngai ya motuya, oyo ayekemi na etutu kuna sikawa. Alobaki ete amonaki yango lokola etape oyo babándisi likoló na mobimbi. Pe tozalaki kosolola likolo na yango mokolo wana na biró. Ndeko Ruddell atungisamaki ndenge makambo ekómi pe—pe molimo oyo ezali kati na mangomba mikolo oyo, ndenge ebandi kokweya. Batei bautaka bipai na bipai, na masolo awa, batunaka: “Likambo nini, Ndeko Branham? Likambo nini?” Ólalá!

49 Ndeko Ruddell atunaki ngai boye: “Bazuaka bomoi uta na molimo ya Satana, to boni?”

50 Nalobaki: “Te, etape oyo babándisi ezuaka bomoi uta na makasi ya mobímbi.” Ezali na bomoi mpamba te, mbuma na ndimo, ndi—ndimo—ngai ebotami na nzete na malala; kasi ekobota malala te, atako ezali kobika uta na bomoi na yango.

Pe lingomba, oyo ya maloba, ezali kaka etape oyo babándisi, ezali kobika wana elati nkombo ya losambo, elati nkombo ya lingomba. Bakatoliko pe Bamisioni, bitape ya mpamba oyo babándisi, bazali kozua . . . makasi uta na mobímbi; nzoka nde bazali kobota mbuma ya oyo bango bazali, mpo ete babongwanaki te. Bazalaki te kati na mwango na Nzambe oyo ya ebandeli, oyo ebongisama liboso, yango wana basengeli koboya Liloba pe kobota mbuma ya lolenge mosusu. Nzete oyo ya solosolo, uta na misisa na yango, ebongisama liboso mpo na kobota malala na nzete ya malala.

Yesu alobaki: “Ngai nazali Mobímbi; bino bozali bitape.”

51 Kasi soki nzete yango ebimisi etape mosusu, ekobota mbuma na yango ya engengela. Pe etelisa ete kozongisama ya makambo oyo nyonso ezala, na suka mpenza ya Mobímbi. Esengeli ete kozongisama ezala, eya, Pole moko ya mpokwa, mpo engengela Yango pe etelisa Yango. Kasi ekouta na Mobímbi, na ebongiseli oyo ebándisami na yango te; kasi mbuma ya ebandeli oyo ya Liloba. Esengeli komonisama mpo na ntango na mpokwa. “Pe

Pole ekozala na ntango na mpokwa.” Esengeli ete Pole ezala mpo na kotelisa Yango.

⁵² Bomoni ndenge Makomi ebongi be! “Mokolo oyo ekobengama moi to butu te.” Mbuma ekoki kotela te soki moi etelisi yango te. Ata soki otei boni, osali boni, ekoki kotela te, ekoki komonisama te, ekoki kotatolama te; soko bobele na nzela na Ye Oyo alobaki: “Ngai nazali Moi na mokili,” Liloba. Bongo esengeli ete Nguya mo—mo—moko eya, Molimo Mosantu Ye moko, mpo na kotelisa, to kotatola, to kotalisa polele, to komonisa oyo Asila koloba ete ekosalema na mikolo oyo. Pole na mpokwa nde eboti yango. Ntango nini oyo!

⁵³ Mwasi na libala alekaki kaka na esika yango oyo Azalaki ntango Alekaki na ebandeli. Kasi nazalaki komona Ye kobima na nzela, pe nazalaki komeka kozongisa Ye. Nde, makambo mingi ekoki kolobama likolo na makambo oyo, na ntina na mikolo oyo tozali kobika kati na yango.

⁵⁴ Sikawa, na mokapo ya 6:1, Hosea alobaki: “Bozonga epai na Yawe.” Bomikanisela, alobaki ete bakopalangana, pe bapalanganaki. Alobaki: “Bakozonga epai na Yawe, nsima na bango kopalangana, pe Ye, akokanga mpota na bango.” Botala: “Bozonga... Bakopalangana; ya mibale... Bazokisamaki, pe babomamaki miso.” Yango mpenza nde esalemaki. “Akobikisa biso, pe Akokanga mpota na biso.”

Lokola Ezekiele 37: “Mikuwa mikauki, lobwaku oyo etondi na mikuwa mikauki.” Ezekiele amonaki yango, bozóngi na bango.

Lisusu botala, Hosea alobaki: “Nsima na mikolo mibale! Nsima na mikolo mibale Akozonga epai na bango. Akoyamba biso pe Akopesa biso, Akobikisa biso lisusu.” Nde, *kobikisa lisusu* elingi koloba te ete “lisekwa.” *Kobikisa lisusu*, wana, ezali kaka liloba yango oyo basaleli bisika mosusu nyonso, nautaki kotala ndimbola na yango, elingi koloba “kolamuka.” “Akobikisa biso lisusu nsima na mikolo mibale.” Ekozala: “Na mokolo na misato Akobikisa biso lisusu, nsima na Ye kopalanganisa biso, pe koboma biso miso, pe kozokisa biso.”

⁵⁵ Boyebi, Bayuda babomamaki miso na ntina mpenza ete biso tokoka komona. Bazokisamaki, pe bapalanganaki, ekólo na bango, pe baboyaki Masiya na bango; mpo ete biso tokoka koyamba Masiya, mpo ete libota moko ekoka kobengama kobima na Mabota mpo na Nkombo na Ye.

⁵⁶ Nde, mobali liboso, pe mwasi azui nkombo na ye. Bato na Mabota oyo babomami miso, oyo bazali komona Nkombo oyo te, “Nkolo Yesu Klisto,” mpo na libatishi! Ezali mpenza mawa mingi, kasi esengeli kozala ndenge wana. Bayuda, basengelaki—basengelaki komona yango te. Moto bobele moko oyo akoki komona yango; ezali ye oyo atindama liboso mpo na komona yango. Soki bongo te, okomona yango te.

Bayuda bazalaki komona te ete ezalaki nde Masiya na bango. Nzoka nde, bazalaki bato na mayele, pe na likindo, bato na lokumu monene mpo na mayele na bango, oyo batangáká Biblia kaka oyo bozali kotanga. Kasi, nsima na yango komonisama epai na biso, tokoki komona yango polele, ete ezalaki nde Masiya. Kasi, bakokaki komona yango te, lelo oyo pe bazali komona yango te. Esakolamaki ete bango pe bakobomama miso.

⁵⁷ Esakolamaki ete lelo, lingomba ekobomama miso, ekoboya Nsango ya ntango na mpokwa. Emoniseli 3 elobi bongo. “Yo moto na bolozi, na makambo na mawa,” botala lolenge ya mwasi na libala na mpokwa wana, to lolenge ya lingomba, “bolumbu, na miso makufi, pe oyebi te.” Nkolo Yesu, yokela biso mawa! Biblia elobi ete azalaki “bolumbu.” Nauti komona yango kaka sikawa. Lingomba na Laodikia ezalaki bolumbu. Pe ntango etalisamaki na mpokwa wana, ezalaki “bolumbu,” namonaki yango te, “pe ayebi yango te.”

⁵⁸ Oh, matondi mingi! Boni, bokamwa te soki tozali kozongisa matondi mingi! Namoni ete tozongisaka matondi oyo ekoki te mpo na makambo oyo Nzambe amonisaka biso.

⁵⁹ “Bolumbu.” Pe bimononeli yango elobaki, emonisaki ngai ete azalaki bolumbu pe ayebaki yango te, pe “abomamaki miso.” Ndenge Yisalaele abomamaki miso mpo ete Mabota ekoka kokota, sikawa Mabota ebomami miso mpo ete Mwasi na libala akoka konetolama pe Yisalaele akoka koyamba eyenga ya Bakelelo. Ebongi be mpenza!

⁶⁰ “Nsima na mikolo mibale Akobikisa biso lisusu, to Akopesa biso kolamuka, Akoyanganisa biso, Bayuda,” wana nazali koloba na ntina na Bakelelo. Pe Ako. . . “Pe tokobika na liboso na elongi na Ye, to tokozua Bomoi na Seko. Bomoni, tokozala na liboso na elongi na Ye.” Biblia elobi awa na Hosea, elobi: “Pe tokobika na liboso na elongi na Ye; Bomoi, kozua Bomoi liboso na elongi na Ye.” Ezali nde Bomoi na Ye moko, Bomoi na Seko, “Tokozua Bomoi liboso na elongi na Ye.”

“Kasi ye oyo azali kobika na bisengo asili kokufa ata azali naino na bomoi.” Bongo biso. . . elakámá ete Yisalaele akozua lisusu Bomoi liboso na elongi na Ye. Akúfá, na misala, pe na eyenga na pantekote.

⁶¹ Sikawa botala malamumu. “Pe lisusu nsima na mikolo mibale.” Kasi, yango elingaki koloba te ete mikolo mibale ya butu na moi, mpamba te eleki. . . Yango esila kosalema kala, eleki mibu nkama na nkama. Bomoni? Elingaki koloba, “mikolo mibale mpo na Nkolo,” nsima na mibu nkoto mibale. Sikawa, boyebi ntango boni eleki uta ntango wana? Eleki mibu nkoto mibale na nkama nsambo uta ntango wana, mpamba te awa na ntango na Hosea ezalaki na mobu 780 liboso na mbotama na Klisto. Kino na mobu 1964, bomoni, eleki mibu nkoto mibale na nkama nsambo mwa moke. Alobaki: “Nsima na mikolo mibale, na mokolo na misato,

Akobikisa biso lisusu, pe akopesa biso Bomoï liboso na elongi na Ye.” Wana nde esika Bakelelo na bino ezali kokota. Tala ngonga oyo tozali kobika kati na yango, mokolo oyo tozali kobika kati na yango.

⁶² Sikawa, bapalanganisamaki, babomamaki miso, bayanganisami, pe bakómi mosika kati na mokolo yango ya misato. Bomoni yango? Bapalanganisamaki, uta na Palestine, na mokili mobimba. Babomamaki miso, mpo baboya Masiya. Pe sikawa bayanganisami na ekólo na bango moko, babelemi mpo na Bakelelo, mpo ete bayeba Bopetolami.

Ndenge Biblia elobi: “Ntango bakoyamba Yango, pe bakomona Ye ná bilembo na nsete,” wana Lingomba esili konetolama, “na bongo bakoloba: ‘Ozuaki bilembo oyo epai wapi?’ Akoloba: ‘Na ndako ya baninga na Ngai.’” Pe Alobaki: “Bakokabwana, libota moko na moko, pe bakoganga pe bakolela, mikolo ebele, lokola libota oyo ekufeli mwana mobali na bango na likinda.” Bomikanisela, eyenga wana ya Bakelelo esengelaki kosala bongo. “Kolela, kosala matanga mpo na Mbeka oyo ebomamaki,” pe bango baboyáká Yango.

⁶³ Bazali kati na mboka na bango. Bapalanganisamaki, babomamaki miso, kasi sikawa bayanganisami. Pe nyonso wana esalemaki na ntango na Elembo ya Motoba, Bakelelo na bango Nsambo. . . eyulaki mpo na koyanganisa bango, Kelelo ya Motoba. Oyo ya Nsambo nde ezali “Kelelo oyo ya Monene,” ndenge tomonaki yango lomingo eleki. Kelelo ya Motoba eyulaki na ntango na Elembo ya Motoba. Ndenge mpenza Elembo na biso ya Motoba efungwamaki, makambo nyonso mbala moko; kaka nde, oyo ya bango eyulaki nyonso mbala moko; nzoka nde, biso tosali mibu nkoto mibale kati na eyenga na pantekote.

⁶⁴ Sikawa, eleki mibu nkoto mibale na nkama nsambo uta ntango wana. Alobaki: “Na mokolo na misato, tokoyanganisama lisusu. Nsima na mikolo mibale, na mokolo ya misato, tokoyanganisama lisusu, pe tokozua Bomoï na liboso na elongi na Ye.” Bomoni elaka yango? Ngonga yango ekomámá malamû mpenza likolo na etutu. Tomoni epai wapi tozali kobika.

⁶⁵ Sikawa na ekólo na bango, bazali kozela eyenga ya Bakelelo, to kozela koyeba Bopetolami, pe kozela Boyei, mpo na kosala matanga mpo na koboya oyo baboyaki Yango na mbala ya liboso. Bazali na ekólo na bango mpo na yango, bazali kozela. Eloko nini bango nyonso. . . Nyonso etiami na esika na yango.

⁶⁶ Lokola motei ya Nsango Malamû, namoni ata eloko moko te oyo etikali, kaka bokei ya Mwasi na libala. Pe Mwasi na libala asengeli konetolama liboso ete bango bayeba nini esalamaki. Bakangamaki, bapalanganisamaki. . . Nalingi koloba, bapalanganisamaki, babomamaki miso, kasi sikawa bayanganisami. Eloko nini etikali? Mwasi na libala álongolama na nzela. Bazali kozela bokei ya Mwasi na libala, mpo ete

basakoli na bango ya Emoniseli 11 bákoka kobengisa bango na eyenga ya Bakelelo, mpo bamema bango na koyeba likambo oyo basalaki.

⁶⁷ Bomikanisela, kaka katikati na Bilembo yango, Elembo ya Motoba eyaki. Pe bazalaki nkoto mokama na ntuku minei na minei, oyo baponamaki pe babengamaki. Pe na kati ya Kelelo ya Motoba pe oyo ya Nsambo, Emoniseli 11 emonani, kaka wana pe ekokani mpenza na Elembo ya Motoba.

⁶⁸ Mpo na kosala nini? Esengelaki kosala nini? Esengelaki komema batatoli mibale, Mose ná Eliya, basakoli. Mpamba te, Bayuda bandimelaka kaka basakoli na bango. Bakoya ná elembo ya basakoli, pe mosala na bango ekozala oyo ya basakoli, mpamba te basaláká mpenza bongo.

Ezali kotalisa likambo se moko, ete, moto, ntango akufi to nini, ntango otiki mokili oyo, lolenge na Yo ekobongwana te. Soki ozali na lokuta sikawa, okozala pe na lokuta kuna. Soki ozali na motema mokuse awa, okozala pe na motema mokuse kuna. Soki ozali moto na ntembe awa, okozala pe moto na ntembe kuna. Mibali pe basi, ekómi ntango ya koningisa nzoto pe komitala malamumu mpo na komona epai tokómi, mpamba te liwa ebongolaka eloko te.

⁶⁹ Basílá kokende eleki mibu nkoto mibale. Mose, pene na mibu nkoto mibale na nkama mitano, pe Eliya uta . . . Pene na mibu nkoto mibale na nkama mitano eleki uta Eliya akendé, pe Mose asíláká kokende, pe bango oyo bazali kozonga kaka na lolenge yango pe bazali kosala kaka makambo yango.

Liwa esalaka moto eloko te kaka kobongola efandelo na ye. Ekobongola lolenge na yo te. Ekobongola kondima na yo te. Ekobongola eloko moko te kati na yo kaka efandelo na yo.

⁷⁰ Boye, lolenge na yo ezali na ngambo nini na ntongo oyo! Soki ozali mobeti ntembe ya Liloba na Nzambe, okozala pe mobeti ntembe kuna. Etali ngai te boni ozali mosántu, ndenge obikaka, pe boni obikaka malamumu, kufa ekobongola yo ata moke te, kaka efandelo na yo. Pe soki okoki koyamba Liloba na Nzambe mobimba ndenge Ekomami te, okosala yango Kuna te; boye, komitungisa te, okozala Kuna te.

Osengeli koyamba Yango na mobimba na Yango, na nguya ya kotatolama na Yango pe na emoniseli ya oyo Yango ezali, na ntango wana okómi eteni na Yango. Akosekwisa bobele Liloba na Ye, ndenge Asalaki mpo na Liloba na Ye na ntongo ya Pasika ya liboso. Kaka Liloba na Ye nde ebimaki, ná baoyo bakufaki kati na Liloba na Ye, wana bazalaki kondima Liloba na Ye pe baoyo batatolaki Liloba na Ye.

⁷¹ Botala, sikawa, eleki mibu nkoto mibale na nkama nsambo. Botala, bapalanganisamaki, babomamaki miso, pe sikawa

bayanganisami. Bongo, likambo oyo elandi ezali ete basengeli koyamba Bomoï.

⁷² Pe bato na Mabota babengami ete babima. Mwasi na libala amilengeli. Konetolama ekómi pene. Tozali kososola yango? Tozali solo kondima yango? Ezali lisolo oyo ebetami? Ezali lisapo, mpo na biso? Ezali likambo oyo ezali komonana lokola solo? Ezali likambo moko, ya libanda, oyo tokoki kondima? To, ezali likambo oyo ezali kati na biso, oyo ezali eteni na biso, ete eleki bomoi mpo na biso? Ezaleli na biso ezali ndenge nini na ntongo oyo, kati na losambo oyo? Bomikanisela, etonga moke nde ekoyamba Yango.

⁷³ Sikawa na ekólo na bango, bazali kozela Bakelelo. Bazali sikawa kozela ete Mwasi na libala oyo moke ákende, mpo ete Emoniseli 11 ékokisama. Eleko na lingomba esili; Bilembo efungwami, etalisi polele oyo batikaki pembeni kati na eleko na lingomba, pe Nsango epesami. Yisalaele azui esika, aleluya, amilengeli mpo na eyenga na Bakelelo.

⁷⁴ Oh, bino na mikili mosusu epai bokoyoka bande oyo, okoki kolamuka te, ndeko mobali? To, Ezali nde koboma yo miso? Okoboya nde Yango pe okobenga Yango esakweli na lokuta? Na ntango oyo, Etatolami mpenza liboso na yo, na nzela na mokili, na nzela na ntango, na nzela na bato, pe na nzela na Molimo Mosantu Oyo akomaki Yango. Etatolami, ezala na nzela na bikelamu, na molimo, na nzoto. Nyonso oyo Alobaki ekokisami pe etalisami polele.

⁷⁵ Yisalaele kati na mboka na ye; bapusaki bango kuna, bakambaki bango kuna, lokola bampate. Bankoi elandaki bango pe ezongisi bango na makasi na esika ya kimia na kobatelama, na mboka na bango. Bomikanisela, Yisalaele azali na elaka ya kopambolama kaka na ntango nyonso oyo akozala na mboka na ye. Nzambe apambolaka Yisalaele soko moke te libanda na mboka na ye. Abalayama abimaki libanda na mboka, akweisamaki. Moto nyonso oyo abimaka libanda na mboka akweisamaka. Nzambe akoki kopambola Yisalaele kaka na ntango oyo afandi na ekólo na ye, pe azali kuna sikawa lokola ekólo. Pe Lingomba ebengami; azali kozela kaka Konetolama, ya Mwasi na libala oyo atiami libanda.

⁷⁶ Bilembo efungwami. Emonisameli biso. Tomoni oyo batikaki pembeni. Bino baoyo bolingi kowelana pe kobimisa mindondo na ntina na momboto na nyoka, na libatizi na mai, pe bongo na bongo, bobomami miso kasi boyebi yango te. Nzambe ya mokili oyo abomi bino miso, mpo na Yango, kasi boyebi yango te. Kokamwa te ndenge nazui kokoso mingi na ntongo oyo, ntango nazalaki kobunda mpo nábima na mitungisi yango!

⁷⁷ Na ntina ete basakoli na bango bakoka komonisama na ntango oyo ya suka; nakoki kosala yango te, mpo na Bakelelo, ya eyenga ya Bakelelo.

⁷⁸ Alobaki na nzela na Hosea: “Nabeti.” Sikawa botala, Azali koloba na Yisalaele. “Nabeti,” to na elobeli mosusu: “Nakati, Nakati mpo na kolongola bango, na nzela na basakoli.” Nzambe asalaka nde bongo mpo na libota na Ye. Akataki bango mpo na kolongola bango na bikólo mosusu. Na nini? Na Mompanga na Ye epeli bipai mibale, Liloba na Ye. Akataki bango, ekólo na Ye, uta na bikólo. Akataki ekólo na Ye uta na bikólo, na nzela na basakoli, Liloba na Ye oyo etatolami.

Ndenge moko Akati pe Mwasi na Ye ya libala uta na bibongiseli, na nzela na Liloba na Ye; elakamaki na Malaki 4, na mikolo na suka. Akataki mpo na kolongola Mwasi na Ye ya libala, Akati Ye uta na mangomba mosusu! Abetaki mpo na kobimisa Mwasi na Ye ya libala!

⁷⁹ Akataki mpo na kolongola, basakoli na Ye; na nzela na, na basakoli na Ye, na Liloba oyo ezalaki kokata Yisalaele. “Kabwana na bango nyonso.”

Tala ntango oyo balingaki kosala lokola bamosusu. Bayaki epai na mosakoli, Samuele. Ye alobaki: “Ngai nasila kozua mbongo na bino? Ngai nasila koloba na bino likambo, na Nkombo na Yawe, oyo ekokisama te?”

Balobaki: “Te, ya, ya solo, kasi tolingi kaka monkonzi.”

⁸⁰ Mangomba esali nde bongo. “Oh, tondimi Liloba. Ezali malamumu, kasi, oyebi, balobi ete tokosengela kosala *boye*.” Oyo bango balobi etali ngai te. Liloba nde elongi!

Bazali kozela. Akataki mpo na kolongola bango, na nzela na basakoli.

⁸¹ Tokómi na ngonga nini, ndeko mobali? Tokómi na ngonga nini, motei? Bomoni ngonga ya mokolo, pe elembo oyo bozali kobika na nse na yango? Bozali kososola yango? Bomoni yango?

⁸² Bisika nyonso sikawa, kolamuka ezali te. Moto nyonso azali komilela, batei bazali kolela. Nazalaki kotanga moko na—na bazulunale minene oyo eyaka awa na losambo, zulunale moko malamumu mingi. Nayebi mokomi na yango, pe nayebi bato yango. Pe bazali basambeli, bato malamumu mpenza, Ndeko mobali pe Ndeko mwasi Moore, ya zulunale *Motindami Liboso na Boyei na Ye*. Moko na bazulunale oyo eleki malamumu oyo ezali kotambola, *Motindami Liboso na Boyei na Ye*. Kasi babimisaka eloko moko te ézanga kolobela: “Bokila, bobondela! Bokila, bobondela! Boyula kelelo! Bozua...” Boni batangaka yango? Boyebi. Bomonaka yango ntango nyonso: “Bokila, bobondela! Bokila, bobondela!” Kaka yango nde toyokaka. “Bokila, bobondela! Ntongo na nkembo ekotana mokolo moko mpo na biso! Eloko moko monene elingi kosalema! Bino nyonso, bobondela, bobondela, bobondela! Ngonga naino eleki te mpo na biso!”

⁸³ Mpo na nini basalaka bongo? Mpo na nini basalaka bongo? Bazali na mposa ya kolamuka monene. Bazali kobebelela, kondima

ete kolamuka ekozala. Bazali bato malamumu. Mpo na nini boye? Basali nini? Basosoli kolamuka ya Mwasi na libala te. Bomoni? Lokola bazali Baklisto, bazali koyoka kobendama ya eleko oyo, kasi bayebi te nini esalemi. Yango nde ezali kosala ete bayoka ndenge wana. Bayebi ete likambo moko esengeli kosalema, kasi, bomoni, bazali kozela yango, ete ekoya, kuna nsima na mikolo, nzoka nde esili kosalema kaka pembeni na bino.

⁸⁴ Ezali ndenge moko na oyo basáláká kala. Bazaláká kondima ete Masiya moko akoya. Bazaláká kondima ete motindami moko akoya liboso. Kasi ekómelaki bango mpenza, pe basosolaki yango te. Bayebaki yango te. Bazaláká kondima ete motindami moko akoya, oyo alingaki koya liboso na Masiya, kasi bakataki ye motó. Pe babomaki Masiya na bango, mpo ete esakolamáká ete bakobomama miso. Hosea alobáká yango.

⁸⁵ Kaka Molimo yango, oyo elobáká na nzela na Hosea, elobaki pe na nzela na Yoane pe elobaki ete lingomba na mikolo oyo na suka ekozala “bolumbu, miso makufi, pe ekobimisa Ye libanda na lingomba.” Bazangaki komona kokokisama ya bisakweli yango. Kasi, lokola bazali kuna na kati, bayebi ete likambo moko esengeli kosalema. Bazali mpenza kososola yango te. Bazali koyeba yango te. Mpenza lokola Bayuda ya kala; Laodikia miso makufi; bozui, likindo, koyina Lingomba, koyina Nsango. Botala ndenge Bayuda yango bayinaki Yoane. Botala ndenge bayinaki Yesu, nzoka nde Ye mpenza nde Moto bazaláká koloba ete bazalaki kozela.

[Amplificateur esali makelele—N.D.E.] Namoni ete fizíble moko ekatani. Nabanzi ete etelemisi pe ba-bande. Etelemisi te. Malamumu.

⁸⁶ Bazalaki koyina Nsango.

Likambo oyo ezali kosalema, ezali se kobakisama; moko na moko kati na bino nyonso azali eloko ya kobimisa molunge. Nzela ya kobatela losambo mpenza na ndenge elongobani ezali te kati na, na bantango ya boye. Mpamba te, bomoni, moko na moko na bino abimisaka molunge na motuya 98, na momesano. Pe bofandi wana kaka kofanda te; bozali kokoba kobimisa molunge. Mopepe oyo ezali na kati awa ekoki mpo na kopesa mpio makasi na esika oyo. Kasi, lokola eloko oyo ebimisaka molunge ezali kosala, bo—bokokoka te.

⁸⁷ Botala, koyina! Kasi, sikawa, lokola Bayuda ya kala, babomami miso! Bazali na Laodikia. Bazali “bolumbu, na makambo na mawa, bato na bolozi, pe bayebi yango te.” Mokolo ya bozui, malakisi minene ya likindo, boyekoli monene, pe sikawa bakómi koyina Nsango. Balingi ata kozala na likambo na Yango te, kaka ndenge ezalaki na mikolo oyo Yesu ya Nazaleta azalaki na mokili.

⁸⁸ Na mikolo na Noa, ntina oyo bato bakotaki na masuwa te, ezali ete bayebaki ata nsango to motindami te. Yango nde

ntina bobele moko oyo bakufaki, ezali mpo ete bayebaki te eleko nini bazalaki kobika kati na yango. Bayebaki te ete Nzambe alingaki kokata likambo ya lisumu ndenge Alakáká ete Akosala. “Akoboma bato, na mokili.” Asiláká kosakola yango. Azalaki kosakana te. Azali pe kosakana te lelo lokola na eleko wana.

⁸⁹ Kasi bato, na esika ete bayamba Noa, bazalaki komona ye lokola mosenzi. Bazalaki kondima te ete azalaki mosakoli. Boyebi, Yesu, Ye moko, ayebisaki biso ete bato basekaki na mikolo na Noa, batiolaki ye, babengaki ye elandálanda pe bankombo mosusu. Kasi bayebaki eleko na bango te. Bayebaki mokolo te. Bayebaki elembo te. Bayebaki nsango te. Bayebaki motindami te, kasi balongolaki ye kati na bango pe basekaki ye. Yesu alobaki: “Pelamoko na mikolo na Noa!”

⁹⁰ Wana Yisalaele azali na mboka na ye, pe nyonso oyo ezali kosalema sikawa, pe Nsango ezali kokota mpenza malamú, tozali kobika na mokolo nini, ndeko? Tokómí wapi?

⁹¹ Bayebaki mokolo yango te. Bayebaki te. Wana nde ntina bazangaki yango, mpo ete bayebaki yango te. Bazalaki lokola lelo, mwa mingi lokola bato ya mikolo oyo, oyo babomami miso na bilembo ya zebi, na lolenge ya biteyelo, na mateya ya likindo. Pe makambo oyo ebomáká bango miso na eleko wana, esali ndenge moko lelo. Ebomi bango lisusu miso.

⁹² Pe, lisusu, komikitisa, komikitisa ya nsango pe ya motindami! Noa azalaki moto na zebi te. Azalaki moto ayekoli te. Azalaki mobola mobokoli bibwele, na komikitisa, ná nsango moko ya pete. Ezalaki pete mingi liboso na zebi na bango monene.

Ezali pe bongo lelo! Nzambe akómisaka yango ntango nyonso pete, mpo na kozua bato oyo bakondima pe bakotiela Ye motema. Ezali Nsango oyo ekesani, ekesani mpenza, kasi bobele Nzambe moko. Sikawa nalingi ete bondima Yango pe bososola ete Nzambe nde alobi Yango.

⁹³ Yesu alobaki ete basekaki mosakoli na Ye, Noa. Pe ndenge basekaki na mikolo wana, bakosala yango lisusu bongo na Boyei na Ye. Balingaki kosala ndenge moko.

Yango nde ntina Falo azindaki na mbu. Ayebaki mokolo na ye ata moke te. Ayebaki ata moke te likambo nini ezalaki kosalema. Akotaki mobimba na misala ya eleko na ye ya zebi, mpo na kotonga bingumba na maboko na baombo. Azalaki na—azalaki na mosala mingi koleka na lolenge ete ayebaki libaku oyo epesamelaki ye te, pe akimisaki motindami-mosakoli na Nzambe kati na eliki. Ayebaki yango te. Yango nde ntina makambo etambolaki bongo. Ayebaki yango ata moke te. Soki áyébaka bobele Liloba na Nzambe oyo elakámáká, epai na libota wana!

⁹⁴ Pe soki mangomba ya lelo bakokaki bobele koyeba, soki mangomba bakokaki bobele koyeba Liloba na Nzambe oyo epesaki elaka oyo epai na bato ya eleko oyo, balingaki kokufa te.

Soki Amerika akokaki bobele koyeba mibeko ya mboka oyo asaláká, alingaki kolinga te kolongola ba-Biblia na biteyelo, kolongola Nkombo na Nzambe likolo na mbongo ya bibende, pe kotika kolapa ndai mpo na ekólo na Nkombo na Nzambe. Kasi azali koyeba yango te. Mpo na nini? Akufi miso, azali bolumbu. Akoki koyeba te makila ya bilenge mibali na motuya oyo bakufaki na bitumba mpo na kozua litomba oyo. Babosani bango; bakómá putulu.

⁹⁵ Kasi Moko azali Oyo azali solo komikanisela makila ya basakoli oyo esopanaki, ntalo oyo esengelaki mpo na komemela biso Nsango Malamu lelo. Bankoto na bato baliámá na bankosi, babwakámá na mabulu, oyo bakatámá na mosumani, batumbámá, babákámá na ekuluse! Nzambe ayebi yango.

Lingomba ebosana basakoli na bango. “Basengeli na bango lisusu te,” ndenge balobaka. Kasi Nzambe ayebi ete Asengeli kozala na bango; Akataka bato na Ye na Liloba na Ye. Kasi mpo na bato ya lelo, Yango esila ngala. Bazali koyeba Yango te. Yango wana bakómi boye. Yango wana bazali “bolumbu, na makambo na mawa, na miso makufi, na bolozi kasi bazali koyeba yango te,” mpo ete bazali koyeba te eleko nini tozali kobika kati na yango. Bazali komona yango te.

⁹⁶ Mose, ayebaki mokolo na ye pe kobengama na ye, ntango amonaki kokokisama ya elaka ya Liloba na Nzambe mpo na mokolo wana. Ayebaki na ntango yango, pe asosolaki nani ye azalaki pe nini asengelaki kosala, na nzela na Liloba ya elaka. Na bongo azalaki kobanga te oyo ata nani azalaki koloba. Azalaki koyokela nsango na ye nsoni te, atako banganzambe nyonso, bafalo nyonso, nyonso, bakonzi nyonso, bayokanaki na ye te. Kasi ayebaki ntango amonaki Pole yango, Likonzi na Móto yango oyo ezalaki kati na nzete yango, Elobelaki ye Liloba oyo elakamaki mpo na mokolo wana, pe elobaki: “Nabengi yo ete ókende kosala yango.” Abangaki te nde—ndenge mokonzi azalaki kokanela ye makasi. Akende ki kuna mpo na komema bato yango na esode, ndenge Liloba na Nzambe esiláká kolaka.

⁹⁷ Emonaki ye elaka kotatolama, abelemisaki bato mpo na esode na bango. Ntango nini? Ntango amonaki elaka na Nzambe kotatolama. Bomikanisela, akímáká ná likindo na ye; akimáká ná mayele na ye. Kasi ntango amonaki Liloba na Nzambe komonisama, amonaki Yango kotatolama, “NAZALI OYO NAZALI,” na bongo alandaki lisusu oyo ata nani alobaki te. Abangaki te oyo Falo alingaki kosala ye. Abangaki te oyo bamosusu balingaki kosala. Abangaki bobele Nzambe, ete akoka kososola Nzambe mabe te, to na ndenge moko boye akoka kososola Nzambe mabe te. Abangaki bato te pe oyo balingaki koloba to oyo balingaki kosala. Abangaki bobele Nzambe, nsima na ye koyeba ete ezalaki Liloba na Nzambe.

⁹⁸ Azalaki kososola te ndenge nini moto lokola ye atindama kuna. Kasi ntango ayebaki, na nzela na Liloba oyo etatolami, nini yango ezalaki, na bongo abangaki lisusu mitindo na mokonzi te. Soki bokokaki bobele koyeba, soki lelo tokokaki bobele koyeba! Mose ayebaki ntango amonaki Liloba kotatolama, ntango amonaki kotatolama lokola elembo, Abelemaki mpo na esode ya libota.

Yobo ayebaki ata moke te ete ezalaki Nzambe. Na ntango nyonso oyo zabololo akoki—akoki kondimisa yo na ntango moko boye ete mimekano mike-mike oyo ozali koleka na yango ezali—ezali Nzambe nde akoki. . . .kopesa yo etumbu! Nzambe nde azalaki komeka kotalisa ye likambo moko. Yobo ayebaki yango ata moke te liboso ete ámóna emononeli. Lokola Mose; ntango Mose amonaki emononeli, ya Likonzi na Mótó na nzete, etatolamaki. Pe ntango. . . .

Yobo, kati na motuna na ye: “Soko moto akokufa, akobika nde lisusu? Namoni nzete kokufa, pe kobika lisusu. Namoni felele kokufa, pe kobika lisusu.” Yango nde ezalaki motuna na ye. “Kasi moto akolala, akobimisa mpema na ye, esili na ye. Bana na ye bakoya kolela, nde ye akoyeba yango te. Oh, soko Okobomba ngai kati na esika na bakufi kino nkanda na Yo ekosuka!” Azalaki kososola te mpo na nini felele ezalaki kokufa pe kobika lisusu, ndenge nini lokasa ezalaki kolongwa na nzete, kokweya, kotikala na mabele pe kozonga lisusu na eleko molunge ekobanda. Alobaki: “Moto akolala, pe ye akokende wapi? Nandimeli Nzambe; kasi nini ekokómela moto?”

⁹⁹ Kasi na nsima, mokolo moko mikalikali ebandaki kongenga, nkake ebandaki konguluma, Molimo ekitelaki mosakoli. Pe amonaki boyei ya Mobali Oyo akokaki kotia loboko na Ye likolo na mosumuki, pe likolo na Nzambe na bulee, pe kotia gbagba kati na bango. Na Bongo agangaki: “Nayebi ete Mosikoli na ngai azali na bomoi! Ete na nsima na kobebisama na nzoto na ngai, nakomona Nzambe longwa na mosuni na ngai!” Ayebaki eloko nini lisekwa.

¹⁰⁰ Balame ayebaki Mwanje ata moke te liboso ete mbalata áloba na minoko na sika. Balame azalaki koyeba te ete Mwanje atelemaki liboso na ye. Motei oyo abomami miso azalaki koyeba te ete Nzambe nde atelemaki wana, komeka kopekisa ye ete ateka likabo na ye na mbongo te. Pe ntango mbalata alobaki na mongongo na moto, Balame ayebaki ete Mwanje nde atelemaki liboso na ye, komeka kopekisa ye kosala oyo azalaki kosala.

¹⁰¹ Oh, bino bibongiseli oyo ekufi miso! Soki Nzambe akoki kosalela mbalata, oyo azali emimi, mpo áloba na lokota oyo ayebi te, mpo na komonisa na motei ete abimi na nzela, Akoki te kosalela moto mpo asala bobele likambo yango? Bakufi miso!

102 Soki Akaba áyébaka ata mokolo na ye, alingaki kokweisa mosakoli Mika te, oyo azalaki na Liloba na Nzambe ya elaka mpo na ye.

103 Ntango Akaba azalaki kuna mokolo yango, ye ná—ná Yosafata. Pe ntango bazalaki na basakoli nkama minei kuna oyo bazalaki kosakola, koloba: “Kende! Nyonso ezali malamumu. Akaba, ozali kobika kati na lisumu. Okómísi biso ebongiseli monene! Tokómí libota monene. Tokómí batei minene. Bisu oyo, tozali banganzambe to basakoli nkama minei, tolakisami malamumu. Tozali nkama minei, tolakisami kati na Liloba pe na likindo. Toyebi makambo Yango malamumu mpenza.”

104 Na bongo, sikawa, etalisaki ete bayebaki makambo Yango malamumu mpenza te. Moto oyo babengaki moto na liboma, na ekeke oyo elekaki liboso na bango, Eliya, mosakoli ya solo ya Nzambe, asilaki kosakola: “YANGO ELOBI YAWE: ‘Bambwa bakoléta makila na yo, Akaba!’” Bomoni?

105 Kasi banganzambe yango, basakoli oyo basalemi na bato, bakanisaki ete babongisaki makambo Yango nyonso malamumu mpenza. Balobaki: “Tata Abalayama . . . to, Tata Akaba, kende! Yawe azali na yo elongo. Ozali na Makomi, mpamba te Nzambe apesaki mboka oyo na Yisalaele. Ezali ya Yisalaele. Kende! Yawe azali na yo elongo.” Ólalá!

106 Kasi, boyebi, Yosafata, moto oyo asanganaki na lisumu te lokola Akaba, amonaki makambo na mwa bokeseni. Alobaki: “Mosusu azali te?”

107 Alobaki: “Mosusu azali awa, kasi ngai nalingi ye te.” Bomoni? Nzambe azalaki kosala nini? Azalaki lisusu kopapa libota na Ye, na nzela na mosakoli. “Ngai nalingi ye te. Mosala na ye bobele kokweisa ngai ntango nyonso. Pe oyebi ete nazali moto monene. Nalingaki kozala na likindo oyo awa te soki názalaka mondimi monene te. Nazali na mibali oyo balakisami malamumu. Natia bango kuna ná babuku pe ná ba-Biblia, pe nyonso mosusu, mpo bateya yango. Pe nayebi ete bazali bato minene.”

Kasi soki Akaba áyébaka bobele nani moto yango azalaki, mwa moto ya mawa wana, mwana na Yimila, oyo azalaki wana, alobaki na ye: “YANGO ELOBI YAWE,” alingaki te kosala libunga monene oyo asalaki. Kasi akweisaki Mika. Asalaki te . . .

Oh, baninga, bóyéba eleko nini bozali kobika kati na yango! Bótála nini esalemaki. Bótála nini elakamaki. Bóyéba mokolo oyo bozali kobika kati na yango.

108 Soki lingomba ebongiseli ya lelo ekokaki bobele koyeba mpo na nini bazali kokweisama, pe bato na bango bazali kokima bango, ndenge Yisalaele bakimaki na Ezipito! Soki bibongiseli bakokaki bobele kotika kokweisa ba-bande oyo, pe bákoka koyoka yango! Pe yo, motei, oyo ozali koyoka bande oyo, yoka! Soki okokaki bobele koyeba eleko oyo ozali kobika kati na

yango, soki okokaki bobele koyeba elembo ya ntango oyo, olingaki komona mpo na nini bato bazali kokima bibongiseli yango. Molimo na Nkolo, oyo ezali kobenga! “Moto akoki koya epai na Ngai te,” Yesu alobaki, “bobebe soko Tata na Ngai akobenda ye. Pe bato nyonso oyo Tata asili kopesa Ngai, na bileko oyo eleki, bakoya epai na Ngai.”

¹⁰⁹ Lokola mwasi moke oyo na liziba, ná nganganzambe, boni bakesanaki! Likomi ezali likolo na etutu lelo, lisusu. Bazali komona yango, kasi bazali koyeba yango te.

¹¹⁰ Soki Bayuda bakokaki bobele koyeba elembo oyo elakamaki ya Masiya na bango, yengebene na mosakoli na bango ya suka! Malaki 3 alobaki: “Tala, Natindi ntoma na Ngai liboso na Ngai, pe akobongisa nzela.” Pe bazalaki koloba ete bazalaki kozela Ye.

¹¹¹ Ndenge—ndenge mpenza ekokani na—na lelo! Balobaka ete bazali kozela ete likambo moko esalema. Mangomba nyonso bazali kosambela, kokila, pe koloba: “Sikawa tosambela. Tosangana elongo. Likambo moko monene esengeli kosalema mpo na biso. Toyebi ete likambo moko monene esengeli kosalema. Lingomba esengeli komilengela.” Bazali kosambela nde mpo na yango.

¹¹² Bazalaki kosambela nde mpo na yango, kuna. Pe Yoane Mobatishi ayaki. Mpamba te, aboyaki balikindo na bango, mpo ete azalaki kosala oyo ekeseni na oyo batata na bango bazaláká koteya. Abimaki na eliki na mayele na mokanda te. Abimaki na nkingo ya elamba ebaluka te, ndenge bakokaki koloba mikolo oyo. Abimaki na boyebi monene ya likondo te. Kasi ayaki, ayebaki na nzela na elaka na Nzambe ete asengelaki kosakola boyebi na Masiya.

Alobaki: “Azali kati na bino sikawa.” Pe bakanisaki ete azalaki na liboma, mpo ete autaki na biteyelo na bango te. Likomi ezalaki likolo na etutu, kasi bazali koyeba yango te. Bazalaki koloba ete bazalaki kozela ete Moto ya ndenge wan aya; pe Azalaki mpenza wana kati na bango. Kasi bayebaki Ye te, atako bazalaki koloba ete bazalaki kozela Ye.

¹¹³ Ndenge moko mpenza, lokola Bayuda, lolenge na bango, lolenge ya Mabota kokokana na oyo ya bango, mpo ete esakolamaki ete ekozala ndenge moko, ndenge moko. Bazalaki koloba ete bazalaki kozela Ye. Kasi bibongiseli, sikawa kati na Mabota, eleko na Laodikia bakufi pe miso lokola bango, mpo ete (mpo na nini?) esakolamaki ete bakokufa miso. Esengeli kokokisama.

¹¹⁴ Soki Yisalaele bakokaki bobele koyeba elembo na bango, balingaki koyeba ete ntango na komonana ya Masiya ekómi pene. Soki bayébaka!

Boyebi, ba—bayekoli balobaki yango epai na Yesu. “Mpo na nini bakomeli bazali koloba ete ‘esengeli ete Eliya aya liboso?’”

115 Pe Yesu alobaki: “Eliya asili koya nde bayebaki ye te. Asilaki koya, pe basili koboma ye. Basalaki mpenza oyo Likomi elobaki ete bakosala.”

116 Soki bakokaki bobele koyeba, ete “elandálanda” wana oyo azalaki kokweisa makambo nyonso ya mabe oyo bazalaki kosala, oyo azalaki kokweisa nyonso oyo bazalaki kosala. . . Alobaki: “Bino bakosi! Bobanda te ko. . . Banyoka kati na matiti, libota na nyoka, nani akebisi bino kokima nkanda oyo ezali koya? Bobanda te komilobela: ‘Abalayama azali tata na biso. Tozali na *oyo, oyo kuna, to oyo mosusu.*’ Mpamba te Nazali koloba na bino ete Nzambe akoki kotemisela Abalayama bana longwa na mabanga oyo.”

117 Bobanda komikanisela te ete bozali na Lisanga ya Molóngó elongo na bino, pe ete bozali na bato oyo balataka malamú koleka. Nzambe akoki, uta na bampuku ya balabala oyo kotemisa bana mpo na kokokisa Liloba na Ye; basi ya ndumba, basi ya balabala, balangwi masanga, basani ya masano ya mbongo. Akoki kosala yango. Azali kaka Nzambe.

118 Bibongiseli ekufi miso, lokola Yisalaele oyo akufaki miso, esakolamaki ete bango nyonso mibale bakozala bongo. Nazali kokokanisa yango mpo na kotalisa bino, kino ete náková na esika oyo nalingi kokóma sikawa. Bakufi miso, lokola bi—bibongiseli ya Mabota ya Eleko na Laodikia, bakufi miso lelo ndenge bakufaki miso kala.

119 Eleko na Laodikia esengeli koyamba Nsango moko! Malaki 4 elobi bongo.

Kasi bazali kozela nini? “Ebongiseli na biso nde ekobimisa Yango. Soki Eyei na nzela na biso te, ba-Batiste, ba-Presbyterien, ba—ba-Asamblé, ba-Unitére, ezali. . . soki biso tobimisi Yango te, Ezali solo te.”

Ndenge moko na oyo basalaki na eleko wana! Eyaki pe ezongaki, kasi bayebaki yango te. Bayebaki yango te, atako ekokisaki Liloba moko na moko. Yesu alobaki: “Basali oyo ekomamaki ete bakosala. Bakosala pe bongo na Mwana na moto,” balingaki koboya Ye.

120 Sikawa botala, ezali ndenge moko sikawa na eleko na Mabota, yengebene na Makomi oyo elakami na Malaki 4.

Pe, Yesu alobaki: “Makomi nyonso epemelami, pe ata eteni na Yango moko te ekoki kozanga kokokisama.” Nzela ya kopekisa Makomi ete ékokisama ezali te. Nyonso esengeli kokokisama. Yesu alobaki ete ekosalema. Pe tala tomoni yango kokokisama. Tozali komona yango.

121 “Kozongisa” nini, na mikolo oyo ya suka? Bino bandeko ya bibongiseli, boyoka! Kozongisa eyenga ya pantekote ya ebandeli. Ndenge Ezalaki na ebandeli, Ekozongisama pe bongo liboso ete eyenga na Bakelelo ya Yisalaele eyula. Esengeli kozongisama!

Esengeli ete eloko moko ezala mpo na kosala yango. Malaki 4 elobi ete ekozongisa Kondima ya batata, epai na bana, yango ekosalama.

¹²² Soki Yisalaele báyébaka Masiya na bango, elembo oyo elakamaki, balingaki kozala esika bazali lelo te. Soki ba . . . Kasi mpo na nini bayebaki te? Ezali mawa. Mpo na nini bayebaki te? Mpo ete Nzambe alobaki ete bakoyeba te. Boni bandimi yango, boloba: “Amen.” [Losambo balobi: “Amen!”—N.D.E.] Nzambe alobaki ete bakoyeba te.

Pe ezali bobele Nzambe yango nde alobi, na Eleko na Lingomba na Laodikia, ete likambo oyo ekosalema, pe yango oyo liboso na bango. Ndenge nini bakoki kosala likambo mosusu soki yango te?

¹²³ Soki bakokaki bobele koyeba elembo oyo elakamaki ya Masiya, elembo ya Mwana na moto! Ayaki na nkombo ya Mwana na moto. Nde, na Eleko na Pantekote mobimba, na nzela na Molimo Mosantu, Azalaki na nkombo ya Mwana na Nzambe. Sikawa, likambo oyo elandi ezali nde Bokonzi ya mbula nkoto, Mwana na Dawidi. “Bana” misato, bobele Nzambe yango. Ye moko: “Tata, Mwana, Molimo Mosantu,” bobele Nzambe yango. Mwana na Dawidi, Mwana na Nzambe. . . Mwana na Dawidi, Mwana na moto, Mwana na Nzambe, ezali bobele Nzambe yango na ntango nyonso, nde kati na misala misato oyo ekesani.

¹²⁴ Ndenge moko pe “Tata, Mwana, pe Molimo Mosantu” ezali Banzambe misato te, kasi Nzambe yango moko kati na bileko misato, misala misato, lokola Tata, Mwana, pe Molimo Mosantu.

Kasi, lokola lelo, bakufi miso na nzela na mimesano ndenge bazalaki kala, bakufi miso na nzela na mimesano, bazali komona yango te. Mpo na nini bazali komona yango te? Bakomona yango soko moke te. Bomikanisela, ezali YANGO ELOBI NKOLO.

Bolobi: “Boye mpo na nini ozali koloba bongo?”

Ndenge mpenza Yoane asalaki, ndenge bamosusu basalaki. Moko akangami awa pe mosusu kuna, pe esengeli kobimisa bango. Oh, bampate na Nzambe, boyoka Mongongo na Nzambe! “Bampate na Ngai bakoyokaka Mongongo na Ngai.”

¹²⁵ Mwasi oyo azalaki na liziba ayebaki mokolo na ye, na nzela na elembo ya Masiya. Azalaki na lolenge mabe. Alingaki te kobebisa ntango na ye na mangomba oyo ya kala, ndenge bazalaki kosala. Bazalaki kobika ndenge balingi, pe, makambo bazalaki kosala, azalaki kondima makambo yango te. Kasi ayebaki ete mokolo moko Moto moko akoya. Moninga mwasi moke, kuna, na nzela ya liziba; akutanaki na Eloko oyo azalaki koluka, ntango Abandaki komonisa ye sekele ya motema na ye, ntango Ayebisi ye lisumu oyo azalaki kobika kati na yango.

Alobaki: “Misie, namoni ete Yo ozali Mosakoli.” Sikawa, bazuaki lisusu ata moko te mibu nkama minei. Alobaki:

“Namoni ete Yo ozali Mosakoli. Pe nayebi ete wana ekoya Masiya Akosala makambo oyo.”

Alobaki: “Ngai nazali Ye.”

¹²⁶ Ayebaki. Ntembe ezalaki lisusu te: “Ndenge nini Okoki kotalisa yango?” Esilaki kotalisama. “Wana ekoya Masiya, Akosala nde makambo oyo.”

Ee, soki ye akoki koyeba yango na nzela na Makomi, biso tokoki koyeba Bapole ya mpokwa pe elembo ya lelo te?

“Toyebi ete wana ekoya Masiya Akotalisa biso makambo oyo nyonso. Akoyebisa biso nde makambo oyo.”

Alobaki: “Ngai nazali Ye, Ngai oyo Nazali koloba na yo.”

¹²⁷ Ntembe esilaki nye. Ye wana akei, pe azalaki koloba na bato: “Boya kotala! Ye oyo.” Ntembe esilaki nye mpo na ye. Likambo esilaki, mpo ete ayebaki mokolo oyo azalaki kobika kati na yango. Ayebaki yango.

¹²⁸ Ndenge moko mpo na Natanaele, Moebele monene, ntango amonaki elembo yango ya Masiya oyo elakamaki kuna; ata soki banganganzambe bazalaki ebele, ata soki nini mosusu ezalaki ebele.

Esalaki nini? Etungisaki banganganzambe, komona bato wana kolongwa na mangomba pe kokende. Alobaki: “Soki moko na bino akei na liyangani na Ye, okobwakama libanda. Tokobengana yo mbala moko na lingomba.”

¹²⁹ Ezali ndenge moko lelo. “Tokobengana yo na ebongiseli na biso soki okei na liyangani na ye.”

¹³⁰ Bozali komikanisela mokufi miso wana? Tata ná mama na ye bakokaki ata koyanola te; bazalaki kobanga. Mpamba te, balobaki: “Moto nani akokende kotala Yesu, to—to akokende na mayangani na Ye, akobwakama libanda.” Kasi, mokufi miso yango, ye moko akokaki koloba likambo na ye, ye oyo azalaki mokufi miso akómákí nde komona.

¹³¹ Ngai, oyo nazalaki mokufi miso, nazali sikawa komona. Ngai, oyo nayebaki makambo oyo te, Emonisameli ngai na nzela ya Molimo Mosantu. Bolembisa nsinga, bino bibongiseli, mpo ete bazali koya, ata ndenge nini! “Soko Nakonetolama na mokili, Nakobenda bato nyonso epai na Ngai moko.”

¹³² Natanaele ayebaki yango. Asosolaki yango.

¹³³ Lokola bilembo ya Mose kati na Makomi, Liloba etatolami. Mose ayebaki ete yango nde ezalaki elaka ya mokolo yango, mpo ete elongobanaki na Makomi, atako ezalaki ndenge. Alobaki: “Nakoki kolobela bango nani . . . Nakolobela bango ete namonaki Pole kuna na eliki. Ndenge nini nakoki kolobela bango sikawa ete Pole moko ezalaki kuna, pe Pole yango elobeli ngai ete nakende kuna?”

Alobaki: “Solo, Mose, Ngai nakozala elongo na yo.” Pe kaka te. . .

¹³⁴ Amitalisaki Ye moko kuna na Ezipito te; kasi kaka na nzela na makamwisi pe bilembo. Kasi ntango Asilaki koyanganisa bango nyonso, Amonanaki na bango lisusu, pe Atatolaki lotomo ya Mose liboso na Baponami pe baoyo babengamaki kobima. Ntango mosakoli yango akataki pe akangolaki bango uta na ekólo wana pe amemaki bango na esika moko boye, na bongo Likonzi na Móto emonanaki lisusu, pe na nsonge na Ngomba Sinai.

¹³⁵ Kokanisa yango na lelo. Amen! Masanzoli na Nzambe! Eleki bomoi mpo na ngai. Mibu na ngai ebandi kopusana, namoni eleko na yauli pe ya makambo ya nsoni kopanzana na bikólo pe nyonso, bongo natali nsima pe namoni eloko nini esalemaki. Motema na ngai etondi na esengo, koyeba ete nsima na mwa ntango, hema oyo nafandi kati na yango na mokili ekobeba, kasi nazali na moko oyo ezali kozela ngai kuna. Nazali komeka kobenda libota moko, kopapa bango longwa na makambo oyo pe nyonso, kobenda bango libanda; kotalisa bango, na nzela na Makomi, ete Nzambe azali wana; ná kotatola ya Likonzi na Móto, oyo bato nkama na nkama pe nkoto na nkoto basilá komona, liboso, pe bakangaki Yango ata foto, mbala na mbala, na ekangelo ya foto, mpo na kosukisa ntembe.

¹³⁶ Bamekoli bazali koya. Solo, esengeli kosalema. Bamekoli bayaki na mikolo na Mose pe basalaki ndenge moko. Nzambe alobaki: “Kabwana na bango, Mose. Kozala pembeni na bango te. Nakozindisa bango nyonso.” Pe mokili ememaki bango. Ezali pe bongo lelo; bazali kozongela mokili noki mpenza, na mayele mabe mpo na kozua mbongo pe makambo mosusu nyonso. Bomoni?

¹³⁷ Elembo ya Mose oyo elongobanaki na Makomi! Azalaki—azalaki mosakoli monene ya Nzambe oyo akendeki kuna mpo na kokangola bango, pe bayebaki yango. Bayebaki elembo. Azalaki elaka mpenza ya Makomi, oyo etatolamaki.

¹³⁸ Yesu azalaki elaka yango ya Makomi, oyo etatolamaki epai na mwasi wana. To, Azalaki Ndimbola. Yesu azalaki Ndimbola ya Makomi. Bomoi na Ye Mpenza ezalaki kolimbola Makomi.

¹³⁹ Bozali komona Nsango na ntango oyo te? Bokoki koyeba epai tokómi? Nsango yango moko, uta na Makomi, ezali kolimbolela bino ntango oyo tozali kobika kati na yango. Ezali ndimbola.

¹⁴⁰ Yesu alobaki na Yisalaele: “Soko bobele bóyébaka mokolo na bino.” Mokolo moko, Afandaki likolo na Ngomba na Bilaya, Atalaki kuna, Alobaki: “Yelusaleme, e Yelusaleme!” Alelaki. Abwakaki miso kuna. Amonaki.

Ezali te mpo na kokokanisa, ntango mosusu, na lolenge moko boye. Na mpokwa moko, na ntongo moko, pene na ngonga ya

zomi, ntango namonaki lingomba wana ya pite. Kuna na kati ya motema, okoyoka Molimo Mosantu kotangisa mpisoli.

“Yelusaleme, E Yelusaleme, mbala boni Nalingaki koyanganisa bino. Kasi bosalaki nini? Bobomaki basakoli oyo Natindelaki bino. Bobomaki bango.”

Pe Bansango oyo etindami epai na lingomba, lelo, ebomami na biyambweli na bango ya bibongiseli. Makomi ebomami na biyambweli na bango. Yesu alobaki: “Soko bokokaki bobele koyeba mokolo na bino! Kasi, ntango ekómi mosika mingi sikawa, ntango eleki mingi sikawa.” Ezali pe bongo mpo na mangomba!

¹⁴¹ Nandimi mpenza, na motema na ngai mobimba, ete asili kokatisa ndelo ya lisiko. Ata soki olingi kokanisa nini mpo na yango, oyo wana ezali ndenge yo omoni. Oyo ya ngai yango *oyo*. Bomoni? Otindami komona lokola ngai te. Kasi nakanisi ete asili kokatisa ndelo ya lisiko, pe akatisi yango, na mibu mitano to motoba oyo eleki. Nazali komikanisela. Bozali komikanisela Chicago. Botala malamumu nini esalemi uta ntango yango, pe botala yango ndenge ezali kokoba kosalema. Bomoni? Bomikanisela, nkombo na ngai ekomami likolo na yango. Ebakemi kuna. Ezali YANGO ELOBI NKOLO. Botala soki ezongi nsima te, azali kokoba.

¹⁴² Botala na mobu 1933, ndenge elobamaki ete basi bakomikamba na mikolo oyo ya suka. Ndenge elobamaki ete bato. . . Mussolini, ndenge akosuka. Ndenge Hitler akosuka na liwa moko ya kokamwisa. Ndenge ba-isme misato ekosuka na kominisme. Ndenge mituka ekokóma, lokola liki. Ndenge basi bakokóma kolata bilamba pe bakokóma lokola mibali, ata lolenge ya bakalesó na bango; pe na suka bakokóma kolata eloko lokola nkasa ya mosuke. Ndenge makambo ya nsoni, ndenge bakomikamba na mikolo oyo. Botala oyo basali. Bongo, yango wana liboso na bino.

¹⁴³ Soki basi Baklisto bakokaki bobele. . . basi Baklisto oyo ya maloba bakokaki bobele koyeba, bakokaki koyeba ete molimo ya makambo ya nsoni oyo ezali likolo na bango ezali ya zabolo, mpo na kotinda bango bakata suki na bango. Bobele zabolo nde akoki kosala likambo ya boye. Ekesani na oyo Liloba na Nzambe eyebisi bino, ndenge ezalaki mpenza na elanga na Edene. Basalaki nini? Soki bakokaki kaka koyeba! Bazali komeka koloba: “Oh, mwa motei ya batuntuki oyo nde alobi bongo!” Ezali ngai te. Nazali te koyebisa bino oyo bosengeli kosala. Nazali kaka kozongela koloba Liloba. Soki bakokaki bobele koyeba ete ezali zabolo.

¹⁴⁴ Bazali komibenga Baklisto. Yesu alobaki: “Ndenge nini bokoki kobenga Ngai, ‘Nkolo,’ pe bosali te makambo malobi Ngai ete bosala?” Bakoki kozala Baklisto te. Nazali mosambisi na bango te, kasi nazali bobele koloba oyo Liloba elobi. “Ndenge

nini bokoki kobenga Ngai, 'Nkolo,' pe na nsima bosali te makambo malobi Ngai ete bosala?" Pe Liloba oyo mobimba ezali emoniseli ya Yesu Klisto. "Ndenge nini bokobengaka Ngai, 'Nkolo'?"

¹⁴⁵ Soki bakokaki bobele koyeba ete ezali zabolo, molimo ya makambo ya nsoni. Mwa basi mike ya boboto kuna . . .

¹⁴⁶ Nakanisi ete awa na Jeffersonville, Indiana, nde suka na esika na yauli oyo namóná na bomoi na ngai, na ntina na basi bolumbu. Nakendé na Hollywood. Nakendé bipai nyonso. Nakendé na mokili mobimba, pe namóná mbindo ya ndenge na ndenge. Namóná yango na Paris. Namóná yango na Angleterre, oyo eleki bango nyonso na mbindo.

¹⁴⁷ Nakanisi ete mokolo moko Angleterre ekosengela kozindisama na nse na mbu. Ebongi na yango; mbindo, bosoto, mbeba! Yango nde libulu ya zongo ya makambo ya nsoni ya mkili, bato oyo baleki koboya pe koyina Makomi, oyo namóná na bomoi na ngai. Ekómá bongo mpo ebwáká Solo.

¹⁴⁸ Billy Graham alobaki ete atindamaki kobimisa mwasi na ye na ba-park; mpo na kosangana ya nzoto oyo ezali kosalema kati na basi ná mibali, bilenge mibali ná bilenge basi, kaka wana na park, na miso na bato. Ekómi libulu ya zongo; France pe lokola, mikili mosusu pe lokola. Amerika pe lokola, ezali kozua esika ya liboso na bango nyonso!

¹⁴⁹ Botala lelo oyo. Bazali kotinda bango bakata suki, balata bakupe, bapataló, bamela makaya, pe bazali komibenga bandimi. Ozali kososola te, ndeko mwasi, to mwasi. . . Nalingi náloba, bolimbisa ngai, ndeko na ngai ya mwasi te; oyo azali kosala likambo ya boye. Ozali kososola te ete ezali zabolo? Kasi nini. . .

Lokola Bayuda ya kala, bolingi kondima Liloba oyo etatolami te na ntango oyo Etalisami polele liboso na bino. Bokangami kaka na mimesano na bino ya bibongiseli oyo elobi ete mabe ezali te. Bolobaka minoko na sika, bopimbwa-pimbwaka, boyembaka na molimo, kasi bozali kokata suki. Bokoki komikanisela Moklisto kosala bongo?

Namóná milimo mabe, namóná banganga-nkisi, namóná bango koloba minoko na sika pe kolimbola yango, kopimbwa-pimbwa pe kobina na molimo; komela makila na mokuwa ya motó ya moto, pe kotuka Nkombo na Yesu Klisto.

¹⁵⁰ Bolobaka: "Nazali moto na lingomba. Aleluya! Nkembo na Nzambe! Na. . ." Ozali moto ya nini?

Lingomba ezali nde Liloba! Pe Liloba elobi: "Ezali nsoni mpo na yo kosala bongo."

Bino etonga na Bafalisai bakufi miso, oyo bozali kokamba bana ya bato na lifelo boye; mpo ete bozali kobanga ete bózanga bilei, pe ete bóbwakama libanda na bibongiseli na bino soki

bobandi kosala likambo na ntina na Yango. Nsoni na bino, bino bakosi! Boyoka nsoni mpo na yango. Komona ndenge ntango ezali kobeleva boye, pe na nzela na mimesano na bino, bopesi Liloba na Nzambe mokongo. Bozui mpiko oyo wapi, bakufi miso!

¹⁵¹ Biblia elobi te ete bozali bakufi miso? Bokoki kososola te ete bozali bakufi miso? Biblia elobi ete bozali bongo. “Pe ozali bolumbu, moto na makambo na mawa, na bolozu, na miso makufi, pe oyebi yango te.” Wana ozali kokanisa ete ozali na ndakonzambe oyo eleki monene kati na engumba, pe ozali kosala oyo, oyo kuna, to oyo mosusu; Biblia elobi ete ozali suka na mobola, pe ozali mokufi miso. Atelemi naino na ekuke, Azali koluka kotekela yo mwa mafuta; kotekela yo te, kasi kopesa yo, pe olingi koyamba yango te. Ezali kokokisa Makomi.

¹⁵² Bozali kobika na mokolo nini, bandeko? Bozali koyeba eleko, koyeba elembo?

¹⁵³ Soki bakokaki ata kososola, basi yango, ete yango ezali zabolo. Ezali molimo mabe ya makambo ya nsoni, na nkombo ya losambo. Azalaka ntango nyonso bongo. Ayaki epai na basakoli nyonso, ayaki epai na bato na bwanya nyonso, ayaki ata epai na Yesu Klisto, na lolenge ya mosambeli. Pe Biblia elobi ete “akozala mpenza pene na mikolo ya suka,” ata ba-Pantekotiste, “pe akopengwisa ata baponami,” ya lingomba yango ya Pantekote, “soko nde akokoka.” [Maloba mazangi na eteni oyo ya bande—N.D.E.]

¹⁵⁴ “Mingi te,” Alobaki, “mpo ete ekuke ezali na nkaka pe nzela ekangani, pe baoyo bakomona yango bazali mingi te. Mpamba te pelamoko na mikolo na Noa, oyo kati na yango bato mwambe babikaki, ekozala pe bongo na boyei na Mwana na moto.” Bokanisa naino! Tozali kobika na mokolo nini? Bozali koyeba eleko, koyeba mokolo?

Nazali kozua bino ntango mingi, kasi natikali na mwa miniti. Bomoni?

¹⁵⁵ Kotinda bango ete bakata suki na bango. Bongo, balobaka: “Lingomba na biso etalaka ata yango te.” Boyebi ntina? Bazali bakufi miso.

“Ezali mabe te soki bokati suki.” Biblia elobi ete ezali mabe! Ezali ata nsoni mpo na yo kokata ata suki pe ata kobondela.

Olobi: “Kasi, mwasi asengeli kozipama.” Pe Biblia elobi ete “suki” na ye nde ezipeli na ye. Ekoti te; suki na ye!

¹⁵⁶ Bongo soki Mose alobaka: “Nakolongola ekoti na ngai na esika ya sapato”? Elingaki kobonga te. Nzambe alobaki: “Sapato,” pe Nzambe alingaki koloba sapato.

Alobaki “suki,” ekoti te! Nkembo na Nzambe! Asepelaki na yango, na ntembe te. Nzambe asanzolama! Alingi koloba mpenza oyo Alobi. Likomi ekolimbolama na moto moko te. Elingi koloba

kaka mpo na ebongiseli na bino te; Elingi koloba mpenza oyo Yango elobi, pe Ye nde molimboli.

¹⁵⁷ Bolobi: “Nayebi mwasi moko oyo asalaka bongo.” Oyo yo oyebi etali ngai te. Ngai nayebi oyo Nzambe alobi mpo na yango. Yo sala oyo olingi.

¹⁵⁸ Soki bakokaki bobele koyeba soki ezali nini; madame. Hum! Soki okokaki bobele koyeba! To, “mwasi,” madame te.

¹⁵⁹ Namonaki etánda moko, ntango nautaki na Blue Boar, kuna na, na Balabala ya Mitano nakanisi, mwa nganda ya masanga, ekomami: “Bamesa mpo na ba-madame.” Natelemaki kaka wana; nalobaki: “Naino boyambi ata moko te.” Madame akokota na esika ya boye te. Mwasi mbala mosusu, kasi madame te.

¹⁶⁰ Bososoli, kokweya ya mokili ebandá na makambo ya nsoni ya mwasi? Boyebi ete esengeli kosuka pe bongo, na makambo ya nsoni ya mwasi? Pe lingomba, oyo etalisaka yango, ezali nde mwasi? Lingomba ezali mwasi, na elobeli ya molimo.

Mwasi na libala pe azali mwasi, na elobeli ya molimo.

¹⁶¹ Makambo ya nsoni ya lingomba, ndenge ezali kosalema! Botala bimononeli, botala makambo, bomona ata bimononeli oyo Nzambe azali kopesa, pe emononeli yango ezali ya solo. Natii Biblia na ngai likoló na motema na ngai, mpo na bino balandi ya bande, pe losambo bazali komona yango. Namonaki yango! Nzambe na Nguya nyonso ayebi ete ezali Solo. Nauti koyeba yango kaka sikawa. Ye wana, “bolumbu, pe ayebi yango te.” Azalaki mpenza kati na ntango ya bisengo. Yango wana.

Kasi ntango Mwasi na libala moke amonanaki, makambo ebongwanaki. “Alifa pe Omega!” Iyo.

¹⁶² Zabolo nde asalaka bongo. Kasi lokola Bayuda ya kala, ntango bamoni Liloba. . .

Pe Yesu alobaki na baoyo ya Ye, Alobaki boye epai na bayekoli na Ye: “Bolukaluka kati na Makomi. Bino, boyebi, bozali komitunatuna na ntina na Ngai pe mosala na Ngai. Bolukaluka kati na Makomi. Kati na Yango bokanisi ete bozui Bmoi na Seko, pe Yango ekotatola na ntina na Ngai, Ekolobela bino nini Nsango na Ngai ezali. Soko bokoki kondima Ngai te, bondima Maloba mpenza oyo Nzambe azali kolimbolela bino.”

¹⁶³ “Tolingi te ete Mobali oyo ákonza biso. Tozali na banganganzambe na biso moko, pe bongo na bongo.” Boye bokende liboso, nyonso oyo ekoki kolobama yango wana. Ntango esili koleka, ata boni. Mimesano ya bibongiseli oyo elobi ete ezali mabe te, yango nde bazali koyoka. Bakosepela kutu koyoka. . . Bondimi li—liloba ya—ya moto koleka ndenge bondimi Liloba na Nzambe. Bazali koyeba te. Mangomba lelo bazali koyeba Timote ya Mibale mokapo ya 3 te. Soki o. . .

¹⁶⁴ Namoni bamosusu kati na bino kokoma biteni yango ya Makomi. Nde oyo ezali biteni ya Makomi oyo nazali kotanga,

awa. Mpo soki esalemi ete moto moko ákanisela ngai yango, to áúna ngai ete nálakisa ye yango polele, nákoká kolakisa ye Makomi oyo elobeli yango. Bomoni?

¹⁶⁵ Bazali koyeba Timote ya Mibale mokapo ya 3 te, esika Elobi: “Na mikolo na suka, bato bakozala bato na nko, bato bavimbi na lolendo, bakolingaka malamú na bango mpenza koleka bolingo epai na Nzambe, bato bazangi boboto, batongi, batomboki, bayini na malamú (Mwasi na libala), bomoni; bato bazali na lolenge na kosambela, nde bazali koangana Nguya na yango; ókíma bango. Mpo ete bamosusu na bango bakoingela kati na ndako pe bakokamba basi na zoba, basi na zoba baoyo bakambami na mposa na ndenge na ndenge, baoyo bazali koyekola soko moke te to bakoki kokóma na boyebi na Makambo na Solo te.” Soko moke te! Bakoki te, pe bakokoka te. Nzambe alobi bongo.

Pe, Mofalisai mokufi miso, ozali komona yango te? Nasiliki te; nazali kaka kobeta nsete mpo ékota malamú. Mangomba pe bazali koyeba Likambo oyo te. Basi bakoki kososola yango te. Basengeli . . . “Basi na zoba, baoyo bakambami na mposa ndenge na ndenge,” Hollywood, makambo nyonso wana, kokata suki, kolata bakupe, kopakolapakola na elongi, makambo nyonso wana, oyo ebongi te. Boyebi ete mwasi azali kosala mosala monene na mikolo na suka?

¹⁶⁶ Boyebi ete Biblia elobi: “Baoyo bakoyeba kokima ekweli monene oyo bakozala etape kitoko liboso na Nkolo”? Mokolo moko nakoteya yango, soki Nkolo alingi, na ntina na yango, na ntina na bino basi. Nakotalisa bino oyo Nzambe akanisi na ntina na mwasi oyo akimi mpenza ekweli ya mikolo oyo. Alobaki: “Akozala kitoko.”

¹⁶⁷ Mokolo wana, nayokaki mwasi moko koseka . . . Elenge mwasi, mwa basi oyo bazalaka pene bolumbu, oyo bomoto na bango ezali na nse mingi koleka oyo ya—ya mama mbwa, azalaki koseka mobange moko ya mwasi oyo alataki róbe ya molai. Yoka malamú, yo mwa mwasi otambola motó, azali na eloko moko oyo yo oyebi ntina na yango te. Azali na bomoto. Oyebi ata nkombo oyo te. Obungisa yango toloba uta mbotama. Oyebi ata bokeseni te kati na malamú ná mabe; ye ayebi. Azali na eloko moko oyo ebombami na motema na ye oyo yo oyebi ntina na yango te. Obungisa yango; okoki lisusu kozua yango te. Komeka kobenga ye asila ngala te, to nkombo moko boye. Ayebi eloko moko oyo yo oyebi ntina na yango te. Kati na motema na ye, abómbá libongi ya bopolo. Yo oyebi ata likambo moko na ntina na yango te. Mama na yo abokola yo bongo. Mokengeli na yo apesaki yango nzela; etalisi lolenge na ye. Nazali koteya sikawa nde na ntina na ye awa. Bomoni? Mangomba, bomoni epai bokómi?

¹⁶⁸ Yesu alobaki: “Likomi oyo mobimba esengeli kokokisama.” Pe Ekokisami.

169 Botala: “Lokola Yane ná Yambele batelemelaki pe Mose,” akotambola mingi, bamosusu kati na bango. Te, sikawa, azali kolobela te ba-Methodiste, ba-Batiste, awa; bazali ata kati na likambo yango te. Bomoni? “Kasi lokola Yane ná Yambele batelemelaki Mose ná Alona, bango pe bakosala bongo; bato oyo na makanisi mapengwi mpo na Solo,” bapengwisami pe bakoti na biyambweli pe malakisi na lingomba, na esika na Biblia.

Pe lisusu Yane ná Yambele bakokaki kosala nyonso oyo Mose akokaki kosala. Bomoni, “lokola Yambele,” bomoni kokokana wana?

“Lokola Yane ná Yambele batelemelaki Mose, bato oyo makanisi mapengwi bazali pe kosala bongo mpo na Solo, kotelemela Yango,” balingi te ete Ezala pembeni na bango, balingi ata kosala elongo na Yango te, balingi kozala na likambo moko na Yango te. Kasi elobami: “Bolema na bango ekoyebana.” Ntango Mwasi na libala akozua esika na Ye pe akomata na likolo, ekoyebana, bomitungisa te; lokola Mose, ntango amemaki bana na Yisalaele, pe akimaki libanda na Ezipito, pe Ezipito ezindaki. Malamu.

170 Yesu alobaki: “Makomi nyonso mapemami na Molimo, yango wana Makomi nyonso masengeli kokokisama.” Ntango A. . .

Batunaki Ye, balobaki: “Ozali komikómisa Nzambe.”

171 Alobaki: “Bino, kati na mibeko na bino moko, bokobengaka basakoli oyo Liloba na Nkolo eyeli bango, bobengi bango ‘banzambe,’ pe bazali yango.” Alobaki: “Bongo boni bokoki kokweisa Ngai wana elobi Ngai ete Nazali Mwana na Nzambe? Makomi oyo nyonso epemami na Molimo; Yango nyonso esengeli, komonisama Yango nyonso esengeli kokokisama.”

Bomoni kuna, bakufi mpenza miso, bakotaki mobimba kati na maloba ya bato na esika ete bakota mobimba kati na Liloba na Nzambe. Yango nde ezali kotinda basi basala bongo. Yango nde ezali kotinda batei basala bongo. Bakoti mobimba kali na makambo ya eveke na esika na oyo ya Yesu. Bakoti mobimba kati na yango, ná—ná mbongo na bango, losambo monene.

172 Botala naino soki nayebani. Bozua bato, baoyo ya Jeffersonville, mwa etonga moke ya bato ya Jeffersonville; bozua baoyo bauti libanda, ya Jeffersonville, oyo bazali na losambo oyo na ntongo oyo, nalingaki kotikala te na, to kozala na bato motoba ya koteya. Ezali nini? Ezali na bato oyo bauti na mboka mobimba; uta na New York, uta na Massachusetts, kino na Boston, Maine, Tennessee, Georgie, Alabama, pe na mboka mobimba. Basangani. Amen! Yango nde oyo Alobaki. “Pole ekozala na ntango na mpokwa.”

173 Bakoki koyeba Pole ya mpokwa te. Likambo nde yango wana. Azali na ye koyeba Yango te. Akufi miso mpenza. Biblia elobi ete azali bongo.

¹⁷⁴ Russie auti kozua esika na ye na mokili, na oyo etali zebi, eleki mibu soki ntuku minei te. Boyebi, ntango Etumba ya Mokili mobimba ya Liboso ebandaki, ba . . . Bazalaki kokeba na Russie te. Ndeko Roy . . . Ezalaki mwa etonga ya bainga, bato mpamba ya Siberie, ná mandefu elongi mobimba, pe bayebaki kokesanisa loboko ya mobali ná ya mwasi te. Ya solo, Russie, kasi ayebaki esika na ye. Asengelaki koyeba yango mpo na kokokisa Makomi. Boyebi bisakweli na ngai na ntina na oyo nalobaki ete ekosalema, ndenge bango nyonso balingaki kosangana kati na kominisme. Sikawa ye nde azali liboso kati na mokili na oyo etali zebi. Bisó tozali mosika mpenza nsima na ye. Bikólo mosusu nyonso ezali nsima na ye. Azui esika ya liboso na mokili mobimba. Auti koyeba ete ye pe azali na mwa bato ya mayele.

¹⁷⁵ Botala, moto azali kaka na biyokeli motoba oyo azalaki na yango eleki mibu nkoto motoba. Eleki mibu nkoto motoba, ná biyokeli oyo azalaki na yango, nde asanganaki na efandelo na ye ya mokili pe asalelaki Nzambe. Pe sikawa, kati na mibu ntuku nsambo na mitano oyo eleki, moto yango alongwe na likalo ya mpunda, kino kokende na minzoto. Mpo na nini? Apesi kondima na ye epai na Nzambe mokongo, pe atali na ngambo na biyokeli na ye pe na makoki na ye ya bomoto. Bomoni yango? Atiki kotiela Nzambe motema. Amitieli motema.

¹⁷⁶ Lokola mwasi mozangi kondima wana. Nkombo na ye nani, kuna na Washington, oyo abongolaki makambo nyonso oyo? [Moto moko alobi: “Murray.”—N.D.E.] Nkombo na ye nani? [“Murray.”] Murray, alobaki: “Wana tozali na mampinga ya basodá pe bamasuwa ya bitumba, tozali na bosenga ya mobange Yawe te.” Hum. Oyo tozali na yango etali ngai te.

Mpo na ngai, to ezali Yawe, to eloko moko te. Ata soki mampinga ya basodá pe bamasuwa ya bitumba ezindi, pe ekozinda, kasi Yawe akoumela seko. Na ntango nyonso oyo nazali eteni na Ye, pe mwana na Ye, nakoumela seko elongo na Ye; Ezali mpo na kobianga to kopona na ngai te, kasi na kopona na Ye. Amen, amen! Etali ngai te. Ye nde! Pesa ngai Ye to pesa ngai kufa. Ata soki bikólo eteleme pe ekwei; Yawe akoumela. Asalaki yango, kati na bileko nyonso; ntango Roma ekweaki, ntango Ezipito ekweaki, pe nyonso mosusu ekweaki. Kasi Ye azali kaka Yawe. Oh, aeluya! Namiyoki mosambeli.

¹⁷⁷ Ntina oyo Russie alamukaki na mpongi na ye, asengelaki kolamuka. Kaka ndenge Yisalaele asengelaki kokóma na ekólo na ye. Nzambe asengelaki kozongisa Yisalaele na ekólo na ye, mpo na Bakelelo. Ndenge moko pe Nzambe asengelaki komema Russie kuna, kati na kominisme, mpo ete asala mpenza oyo esakolamaki ete akosala.

¹⁷⁸ Moto ná biyokeli na ye motoba asukaki kaka na kosala likalo ya mpunda, wana atiaki motema epai na Nzambe. Kati na mibu ntuku nsambo na mitano oyo eleki, atiki kotiela Nzambe

motema. Ntango basiniáki mibeko ya Amerika awa, bazalaki kotia Nzambe na nyonso oyo bazalaki kosala. Sikawa bazali lisusu ata na liyangani moko te, pe bazali lisusu kotanga ata Nkombo na Ye te. Ya solo. Bakómí kotalela bonene ya zebi na bango, bango, boyebi ya zebi na bango, to etonga ya bato bazanga bosembo. Ezali mpenza ya solo. Mokili mobimba ekoti mobimba kati na kozanga koyeba Biblia. Bi. . . mokili mobimba epesi Nzambe mokongo.

Kasi, bokanisa naino, kati na nyonso wana, pe bibongiseli ya mangomba, pe kozanga nsoni ya balikindo na bango pe nyonso, Nzambe akamati Liloba ya basakoli na Ye mpo na kopapa Mwasi na libala oyo akondima. Alobaki ete Akosala yango. Alongoli Ye uta na eloko wana, oyo Alakaki ete Akosala.

¹⁷⁹ Bazali kotalela mayele na bango ya bomoto, zebi na bango ya bomoto pe bongo na bongo; batiki Nzambe pembeni, Ye oyo bazalaki liboso kotielala motema. Amerika batiki Nzambe pembeni. Babimisi Ye ata libanda na biteyelo, mpamba te bana na biso ya mike bakoki lisusu ata koyoka makambo na Ye te. Babimisi Ye libanda na biteyelo. Sikawa bazali koluka kolongola Ye likolo na dollar, “In God we trust” [“Totiaka motema epai na Nzambe.”—N.D.T.]. Ntango balápaka ndai mpo na ekólo liboso na bendele, bakolongola “Ekólo moko na bokambami na Nzambe.” Bakolongola yango.

¹⁸⁰ Bomoni, balandi mposa na bango moko pe biyokeli na bango moko. Mpo ete, kati na mibu ntuku nsambo na mitano oyo eleki, abongwani ata moke te kati na biyokeli na ye, azali kaka moto yango oyo Nzambe akelaki na ebandeli.

Kasi, na mikolo oyo na suka, bokoki te koyeba epai tokómi? Lingomba ebaluki, longua na Nzambe, mpo na kotala kuna, likindo pe lobiko ya makambo, pe bongo na bongo, na esika na Liloba. Bazali lisusu ata kolobela Ye te kati na mayangani na bango, na biteyelo na bango, to na eloko moko.

¹⁸¹ Yisalaele, kati na mibu ntuku mibale na mitano oyo eleki, bayebaki ete eloko moko ezongisaki bango na ekólo na bango, ndenge elakámáká. Bayebi te ndenge nini likambo yango esalamaki. Banyokwamaki mingi, babomamaki, na ntango ya Bakelelo yango, kasi bazuami na ekólo na bango. Bayebi ntina te.

¹⁸² Mpo na nini Russie alamuki? Mpo na nini bikólo elamuki? Mpo na nini moto azui makoki ya kosala makambo minene oyo? Na ntango oyo bato na zebi, eleki mibu nkama misato, moto na zebi moko ya France atambwisaki bále na mbangu moko boye na mabele, pe atalisaki polele, na nzela na boluki ya zebi, ete: “Soki moto akómi na mbangu makasi ya mile ntuku misato [kilometele ntuku mitano—N.D.T.] na ngonga moko, gravitation ekotombola ye uta na mabele; kokokana na bozito na ye, kokokana na bozito ya bále yango.” Sikawa akómi kosala mile nkoto zomi na nsambo

[kilometele nkoto ntuku mibale na nsambo] na ngonga moko, bomoni, azali kokoba koluka kobakisa mbangu. Auti koyeba yango, eumeli te. Mpo na nini? Esengeli kozala bongo.

¹⁸³ Kasi, lingomba ezalaki kotelema likolo na libanga ya Yesu Klisto. Ata soki moto alobi nini, bazalaki kokangama kaka na Liloba yango, na nsango ya ntango; Luther, Wesley, pe baoyo mosusu wana. Pe sikawa bazongeli mimesano. Mpo na nini esalemi bongo?

¹⁸⁴ Kati na mibu ntuku mibale na mitano oyo eleki, Yisalaele auti koyeba ete bazali kati na ekólo na bango mpo na ntina moko. Esakólámáká ete basengelaki koyanganisama lisusu; Hosea alobáká bongo. Toutaki kotanga yango. Nzambe asunga biso ete tososola yango! Malamu.

¹⁸⁵ Kaka na ntango yango, Mwasi na libala asosoli Pole na mpokwa, abandi kososola yango. Ba-Pantekotiste oyo bazali na nzala babandi koyeba ete bibongiseli wana ezali na biloko oyo bango bazali koluka te, babungi nzela pe bakabwani mpenza. Bomoni, ekómi ntango ya koyeba, koyeba. Bosengeli koyeba.

Mokili esili koyeba. Bikólo esili koyeba. Zebi esili koyeba. Zabolo asili koyeba ete ekómi ntango oyo akoki kobebisa basi, kobebisa lingomba, kobebisa bato. Asili koyeba yango.

Pe Nzambe ayebi ete libota moko ezali na mokili oyo Abongisa liboso mpo na Bomoi. Ayebi ete oyo nde ntango ya kotinda Nsango na Ye. Atindi yango. Bato basili koyeba Yango, eleko ya Mwasi na libala esosoli Pole ya mpokwa.

¹⁸⁶ Soki Sodoma áyébaka eleko na ye, ntango amonaki batindami oyo bakendeki kuna, lokola Billy Graham ná Oral Roberts!

¹⁸⁷ Sikawa, moto moko oyo azanga nsoni na Phoenix atelemaki pe alobaki. . . abetaki eteni wana ya—ya bande, pe alobaki ete ngai nalobaki kuna, ete mpo na ngai “esengeli ete libatisi epesama na Nkombo na Yesu,” alobaki bongo. Na nsima alobaki: “Sikawa bomoni *awa*, awa alobaki. . .” Ntango nazalaki koloba mpo na Afrika, ndenge bazalaki kobatisa mbala misato na ngambo ya elongi, pe na ngambo ya mokongo. Alobaki ete ngai nalobaki: “Ezali kaka ndenge moko.” Bomoni, abetaki eteni oyo mosusu te; kaka eteni oyo wana, pe akataki.

Mbeba oyo ekoki kotinda moto na bolóko soki asali yango. Ba-bande oyo ebatelami na mokanda ya ndingisa. Moto ásakana na yango te. Malamu ómeka na yo te. Mo—mo—mobeko ekolandela yo. Kasi biso tokosala yango? Te. Alobaki: “Tika bango.” Nzambe ayebisaki ngai nini ekosalema. Botala, bokoba kaka kotala moto yango. Bomoni?

¹⁸⁸ Kaka na ntango yango, Mwasi na libala amoni Pole ya mpokwa.

Soki Sodoma áyébaka eleko na ye!

¹⁸⁹ Sikawa, kaka moto yango akotisaki kati na bande, alobaki: “Boyoka malamú, bino ba-Pantekotiste,” alobaki, “pe bino ba-Batiste. Moto oyo, mosakoli na lokuta, William Branham,” bomoni, “alobi ete Oral Roberts ná Billy Graham bazali kati na Sodoma.” Bomoni, na nsima akati bande; esili, bomoni.

Alingaki kokoba te mpo na koloba ete “Bazalaki batindami mpo na Sodoma.” Kati na Sodoma te, “Bazalaki kuna lokola batindami mpo na Sodoma.” Moto nyonso ayebi ete nalobaki nde bongo. Bobeta bande na bino.

“Moto soko nani akolongola to akobakisa, bakolongola nde epai na ye.” Ezali Liloba na Nkolo. Ekotikala bongo.

¹⁹⁰ “Soki Sodoma áyébaka motindami na ye, alingaki kozala kino lelo,” elobaki Yesu, soki áyébaka ndenge Abalayama ayebaki.

Abalayama ayebaki ete mwana na elaka azalaki koya. Kasi ayebaki ete esengelaki ete mbongwana esalema na lolenge moko boye, mpo ete anunaki mingi koleka, Sala pe lokola. Kasi ntango amonaki Ye Oyo akokaki kososola makanisi ya Sala, na nsima na Ye, ayebaki eleko oyo azalaki kobika. Alobaki: “Nkolo na ngai, tika ete naya na mwa mai awa mpo násukola Yo makolo.” Baliaki eteni na lipa. “Óndima kotikala mwa ntango molai,” bomoni, awa, “N-k-o-l-o na ngai,” N ya monene-k-o-l-o, “Elohim.” Ayebaki ete Nzambe nde azalaki kosolola na ye kati na mosuni na moto. Ayebaki elembo na ye, pe apambwamaki na Nkolo.

Sodoma ayebaki mokolo na ye te, pe azikisamaki mobimba. Yesu alobaki: “Pelamoko na mokolo yango, ekozala se bongo na ntango Mwana na Nzambe ako...to Mwana na moto akomonisama.”

¹⁹¹ Sikawa, lingomba eyebi mokolo na yango te. Lokola Yisalaele, oyo atindamaki kozonga na Palestine, ye pe akotindama kokota na Lisanga ya Mangomba ya Mokili mobimba. Mpo na nini? Ayebi eleko na ye te. “Bino, bobima na ye, bosangana na masumu na ye te!” Bokima, soki te bokosutuka bosili kozua elembo na nyama pe bokokoka lisusu kosala eloko moko te mpo na yango.

“Tika ete moto na mbindo atikala na mbindo naino. Tika ete mosántu,” oyo *akokóma* mosántu te, “mosántu sikawa. Tika ete mosántu,” ezali te ma-...mwasi na suki ekatemi; ekoki kozala ye te. Nde, ezali komonana mpenza makasi, kasi yango nde Makomi. Biblia elobi: “Azali koyeisa nsoni na motó na ye,” pe motó na ye ezali mobali na ye. Motó ya mobali ezali Klisto, boye mwasi yango azali koyeisa nsoni na Klisto. Ndenge nini mwasi yango akoki kozala likambo ya “nsoni” bongo azanga kozala “mbindo”? “Tika ete mwasi oyo azali na suki ekatemi atikala na yango. Tika ete mobali, mwasi oyo alataka bakupe akoba kolata yango. Tika ete moto oyo aboyaka Liloba akoba koboya Yango.”

“Kasi tika ete mosántu atikala mosántu naino. Tika ete moyengebeni asala boyengebene naino; Liloba ya boyengebene oyo ya Nzambe, Mwana na Nzambe oyo amonisami. Botikala basántu naino, bosala boyengebene naino!” Boyeba! Iyo, misie! Mikolo te. . .

Lingomba ayebi mokolo na ye te.

¹⁹² Lokola Yisalaele, azongi na mboka na ye na elaka, ayebi te ndenge nini azongi kuna. Azongisami kuna kaka na pwasa. Mpo na nini? Bokasi ya bikólo nde ezongisi ye na esika na ye.

Sikawa nalingi naloba likambo moko. Bokasi ya bikólo ezongisi Yisalaele na ekólo na ye; bokasi ya bikólo ekokotisa lingomba na Lisanga ya Mangomba ya Mokili mobimba; kasi nguya na Nzambe ekokotisa bato kati na Mwasi na libala. Mokili ezali kobenda epai *boye*, pe mokili ezali kobenda *kuna*, kasi Nzambe azali kobenda na likoló. Molimo na Nzambe, oyo ezali Liloba na Nzambe: “Liloba na Ngai ezali Molimo pe Bomoi,” ekotia Mwasi na libala na esika na Ye. Mpamba te Akoyeba esika na Ye kati na Liloba, na ntango yango Akozala kati na Klisto, ekotia Ye na esika na Ye. Bokasi ya bikólo nde ekosala yango te. Kasi bokasi ya bikólo mpenza nde etambwisaki Yisalaele kino na ekólo na ye; bokasi ya bikólo ya Lisanga ya Mangomba ekokotisa bibongiseli nyonso kati na yango; kasi Nguya na Nzambe ekonetola Mwasi na libala kati na Nkembo, libanda na yango.

¹⁹³ Oh, baninga, boyeba mokolo na bino, ndenge Yesu akebisaki bino; elembo ya Sodoma, pe motindo lingomba ekómi mikolo oyo.

¹⁹⁴ Botala oyo Alobaki ete ekosalema mikolo oyo. Boyoka yango na bokebi mpenza. Elembo ya Sodoma ekokokisama na mikolo oyo; elembo lokola oyo ya Abalayama, mokolo yango liboso na Sodoma, ye oyo abengamaki ete abima. Makambo nyonso oyo esakolamaki, ekokokisama sikawa. Botala malamumu mokolo oyo bozali kobika. Tolobi na ntina na yango mbala na mbala.

¹⁹⁵ Sikawa Alakaki ete Akotindela bino Pole ya Lola, mpo na kotelisa Momboto-Liloba oyo elingaki kolonama mpo na mikolo oyo. Momboto yango ezali na kati *Awa*. Momboto yango nde Biblia. Mpo na nini? Yesu alobaki bongo. “Liloba ezali Momboto oyo moloni moko alonaki.”

Pe, sikawa, liboso ete bokoka kobuka mbuma, ata soki bolonaki momboto, esengeli ete pole ezala mpo na kotelisa momboto yango, soki te ekopola pe ekosala malamumu moko te; ekokufa. Kasi soki momboto moko ezali na mabele, mabele ya malamumu, oyo ezali kozua moi ya lolenge malamumu, esengeli kotela.

Pe Alakaki ete na mikolo na suka, na ntango na mpokwa, Mwana akobima mpo na kotelisa Momboto yango. Momboto ezali koteyama. Mwana na Nzambe azali kotelisa Momboto

yango, na kotatola Yango, na kokolisa Yango liboso na bino pe kotatola ete Ezali ya solo. Bososoli? [Losambo balobi: “Amen.”—N.D.E.] Boyeba mokolo na bino.

Nalingi kosilisa sikawa. Ntango ekoki sikawa mpo na kosilisa.

¹⁹⁶ Pe bato na Laodikia bazui, bakufi miso, bato na mokanda bakolongola Liloba kati na bango. Basali yango? [Losambo balobi: “Amen.”—N.D.E.] Alobaki ete bakosala yango.

Ndenge basakoli ya kala bazalaki kotindama mpo na kotatola Liloba ya elaka ya eleko na bango, mpo ete bato oyo babongisama liboso, ya eleko na bango, bamona Yango. Lokola mwasi oyo na liziba, lokola Natani, lokola Balatimeo mokufi miso, lokola Petelo, pe bamosusu oyo bayebaki Yango. Azalaki Liloba yango. Pe mbano na yango: “Soko Nazali kosala misala oyo Tata alakaki ete Nakosala te, bondima Ngai te. Nde soko Nazali kosala misala yango, ata bondimi Ngai te, bondima misala yango. Ezali koyebisa bino Ngai nani.” Bososoli? Malamu, bozanga komona mokolo yango te, oyo etindami. Basi ná mibali ya bileko eleka bayebaki Yango, bakotaki pe babatelamaki.

¹⁹⁷ Ba-Pantekotiste, ólálá, mpo na nini bozali koyeba eleko na bino te? Boyeba eleko ya ntango na mpokwa. Yango oyo, yango oyo, yango, mpo na kotatola boyei na Klisto, mpo na kotatola yango. Tokómi na suka. Boyeba mokolo na bino.

¹⁹⁸ Nayebi ete naumisi bino ntango molai. Midi ebeti sikawa. Kasi, nalingaka Bilei oyo, Oyo nde Bomoi. Ezali bongo. Ezali bongo, mpo na mondimi. Boyeba mokolo oyo bozali kobika kati na yango, pe elembo ya ntango.

¹⁹⁹ Bomona epai makambo nyonso ekómi: Yisalaele; esika lingomba ekómi; esika makambo ya nsoni ekómi; esika Mwasi na libala akómi. Nini etikali? Likambo oyo elandi, ezali konetolama ya Mwasi na libala. Ya solo, mangomba nyonso ezali kozela likambo moko monene. Ba-Pantekotiste balobi: “Nkembo na Nzambe! Mokolo moko ekoya oyo bakosala *boye*, pe bakosala *boye*.” Bomoni, bazali bobele koloba. Bazali kondima mpenza.

²⁰⁰ Ndakisa, mokolo moko, Kaifa alobaki: “Ezali malamumu te ete moto moko akufa, pe ete bato nyonso bakufa te?” Azalaki nganganzambe mokonzi, Biblia elobi ete yango wana alobaki bongo. Asakolaki, kozanga koyeba eloko azalaki koloba. Kasi asosolaki bosolo mpenza ya likambo yango, ete azalaki kokaba Nzambe mpenza oyo azalaki koloba ete azalaki nganga mokonzi na ye?

Ezali pe bongo lelo! Bazali kozela ete—ete ntango moko monene eya, mosika na ntango moko boye.

²⁰¹ Ee, nakendeke elongo na bango na makita ya Bato na Mombongo. Balobaka: “Nkembo na Nzambe!” Batei mosusu batelemi, baningisi bato pe balobi: “Kolamuka monene ezali

koya. Loboko na Nkolo ekozala likolo na mokili!” Pe bato bakei liboso, bapoti lokola . . . Kasi bazali kososola te ete yango ekosalema na ntango na Bakelelo mpo na Yisalaele. Mpo na nini basalaka bongo? Ezali mpo ete balobaka makambo lokola Baklisto, pe bazali kososola te. Ndenge moko pe Kaifa asosolaki te oyo azalaki kosala. Pe bazali kososola te ete bazali koboya Nsango mpenza oyo etindami mpo na bango. Amen!

²⁰² Eteni moko na moko ya Makomi, toyekoli yango mokolo na mokolo, pe póso na póso, kino ete ntembe esili ete ezali Solo. “Soko bakufi miso bakoki koyamba Yango te,” Yesu alobaki, “tika bango. Soko mokufi miso akokamba bakufi miso, bango nyonso bakokwea na libulu.” Nayebi te ntango nini, nayebi te wapi, kasi nayebi ete ekosalema.

²⁰³ Boyebi, nasosoli mpo na nini Satana alingaki te ete nasala likambo oyo. Lobi, nazalaki mpenza komiyoka malamumu te. Nazalaki kokoka kozua Liloba ata moko te epai na Nkolo. Nasalaki nyonso oyo nakokaki kosala, kasi nakokaki te. Pe lelo na ntongo, ntango nalamukaki . . . Lobi, naliaki mwa masangu, pe ezalaki lokola nde etikalaki kaka wana na likundu na ngai. Nabelaki mpenza, na—nazalaki kokoka kososola yango te. Namilobelaki: “Likambo yango mpenza nini? Nazali kokende kuna, kasi nayebi te eloko nini nakoloba. Pe, Nkolo, nazali ata kokoka kozua eteni na Likomi na makanisi na ngai te, ete nákoma yango. Nazali kokoka kozua eloko te.” Nayebaki mpenza likambo ya kosala te.

Na nsima, wana Liteya ebandaki koyela ngai, Satana azalaki kokoba koloba: “Ozali komiyoka malamumu te. Motó na yo ezali kosala mpasi. Ozali kobela. Okoki kokende kuna te. Okoki kotelema kuna te. Ekozala *boye*, ekozala *boye*.”

²⁰⁴ Nazali komikanisela lisolo ya elenge moko ya Londre, kala, na Angleterre. Azalaki kaka moto lokola bato nyonso. Pe balobaki ete mo—mo—mokonzi, moko na bakonzi ya kala azalaki kokende kokota na ndako na—na ye. Pe, na yango, azalaki na moto te . . . Azalaki na nsango oyo asengelaki kotinda, nsango ya nokinoki, na ntina na monguna. Na bongo a—a—alobaki na elenge oyo azalaki wana, alobaki: “Ma, kamata nsango oyo, kamata nsango oyo! Kende noki na esika *boye*, pe pesa mitindo ete likambo *oyo* esalema.” Pe alobaki: “Kamata lingenda na ngai na loboko na yo. Ekotatola yo, ete na . . . ngai nde natindi yo.”

²⁰⁵ Akangisaki yango na nse na monkoto na ye, pe akendeki. Bipai nyonso basinzili bazalaki kotelemisa ye, ná bato mosusu nyonso. Azalaki koganga: “Bolongwa! Nazali na nsango ya mokonzi.” Amen. “Nazali motindami ya mokonzi,” liloba oyo etatolami.

²⁰⁶ Namilobelaki: “Satana, longwa liboso na ngai! Nazali na Nsango ya Mokonzi. Nasengeli kokende.”

207 Kala, ntango babomáká Nkolo na Kimia, batiaki Ye kati na lilita, bakangaki nkunda na elembo, pe liwa ekangaki Ye mikolo misato butu na moi. Kasi na ntongo ya Pasika azalaki na lingenda na loboko na Ye, pe agangaki: “Liwa, longwa! Lilita, longwa! Fungwama! Nazali Nsango ya Mokonzi. Nasengeli kobima mpo na kotalisa lisekwa oyo polele. Nazali lisekwa pe Bomoi.” Aleluya! Namiyoki mpenza malamau sikawa.

Ezali Nsango ya Mokonzi. Toyeba Yango, baninga, mpamba te tobengami ete tosangana mpo na koyula na Kelelo. “Mpamba te Kelelo na Nkolo ekoyula, bongu ntango ekozala lisusu te.”

208 Ayanganisi Yisalaele. Mikolo misato, na mokolo na misato Alobaki ete Akosala yango. Mibu nkoto mibale na nkama nsambo eleki. Na mokolo wana ya misato Alobaki ete akoyanganisa bango, pe Asali yango. Alobaki ete Akomonisa nzela na Bomoi. Yango oyo, bazali sikawa kozela bobele ete Mwasi na libala alongwa na nzela mpo ete bakoka koya, basakoli mibale, basakoli ya Baebete, oyo bango bakoyeba.

209 Bozali komikanisela ete nazalaki na Caire, mpo nakende kuna, ntango Lewi Pethrus alobaki: “Ndeko Branham, soki kaka bamoni yango. . . Bandimelaka basakoli na bango.”

210 Nalobaki: “Ezali likambo malamau mpo na ngai.” Bomoni ndenge moto azalaka? Kasi bomoni ngolu na Nzambe? Nalobaki: “Nakotanga Kondimana na Sika oyo.” Batangaka Yango. Lewi atindelaki bango, kuna, koleka millio, Ndeko Lewi Pethrus ya Suede. Bazalaki kotanga Yango, bazalaki kokende kuna mbala na mbala, Bayuda yango; bazali lokola etonga ya Bayuda ya mikolo oyo te, kasi oyo bazali na ekólo na bango. Ayaki pe alobi: “Soko oyo azali Masiya, tika tomona ye kosala elembo ya mosakoli, tokondima yango.”

211 Lewi Pethrus alobaki: “Ndeko Branham, libaku malamau yango oyo. Libaku malamau yango oyo. Moto moko ayebisi ngai yango, ete ekozala libaku malamau. Nakamataki nzela,” alobaki, “kino kuna.”

Mobali moko ayaki kofanda wana, Ndeko Arganbright, alobaki: “Ndeko Branham, yango ekolamusa Yisalaele! Mema bango liboso na Yango, pe talisa elembo ya mosakoli. Bakondima yango.”

212 Nalobaki: “Nkolo, ngai oyo, nabelemi.” Namataki noki na mpepo; nakamataki mbongo pe nasombaki tike na ngai; natelemaki moke na Caire. Nalobaki: “Iyo, nabelemi.”

213 Molimo Mosantu alobaki: “Ezali esika na yo te. Ezali ntango na yo te.” Bomoni, okei mbangu mingi. Namilobelaki: “Ólalá. Nakómi kino awa; nako—nakokende kaka.”

214 Eloko moko elobaki: “Suka bobete awa! Kokende kuna te. Kamata nzela ya Inde. Kokende awa te. Kende kuna na Inde, kasi komeka kokende awa te.”

215 Namitunaki: “Mpo na nini?” Ntango nakendeki na nsima ya ndako ya mpepo, nalobaki: “Nkolo Yesu, oyo elingi koloba nini?”

Bongo Amonisaki ngai. “Moto na Mabota te. Basakoli oyo wana nde.” Esengeli kozala yengebene na Makomi. “Mose ná Eliya basengeli koya.” Pe, lisusu, Mwasi na libala naino alongolami na nzela te. “Basakoli yango bakozonga pe bakosala elembo ya mosakoli.” Yango nde Makomi. Na ntango wana nde nyonso ekokokisama, na ndenge ebongi be, Yisalaele akobotama lokola ekólo na mokolo moko mpamba. Amen! Bapole ya mpokwa ezali kongenga!

Pole ekozala na ntango na mpokwa,
Nzela ya Nkembo bokomona yango solo;
Kati na nzela ya mai, nde Pole ezali lelo,
Wana bokundami na Nkombo na motuya na
Yesu.
Bilenge pe mibange, bobongola mitema na
masumu na bino nyonso,
Molimo Mosantu akokota solo;
Bapole na mpokwa eyei,
Ezali solo ete Nzambe ná Klisto bazali Moko.

216 Tozali na ntango na suka, moninga. Pe lisusu tozali kokanisa nzembo oyo ya mokomi oyo azuaki mpemela, ntango alobaki:

Mabota bazali kopanzana, (oyo eleki pene
na mibu zomi na mitano), Yisalaele azali
kolamuka,
Bilembo oyo basakoli basakolaki;
Mikolo ya Mabota ekómi ya kotanga, (botala
mbindo na ye sikawa) etondi na nsomo;
Bozonga, E bapalangani, epai na bino.
Mokolo na lisiko ebelemi,
Mitema na bato ezali kosenzwa na nsomo;
Botondisama na Molimo na Nzambe,
bobongisa pe bongengisa minda na bino,
Botombola miso, lisiko na bino ebelemi. (Ya
solo.)

Basakoli ya lokuta bazali kokosa, bazali
koboya Solo na Nzambe, (ya solo, boye te!)
Klisto Yesu nde Nzambe na biso.

Bazali kondima Yango te. Bazali na ba-isme ya ndenge na ndenge pe nyonso! . . .? . . .solo. Kasi mosakoli alobaki . . .To, mokomi oyo azuaki mpemela alobaki:

Tokolanda matambe ya bantoma.

217 Bozali komikanisela kati na emononeli na ngai? Nalobaki: “Soki bato ya Polo bakoti, baoyo ya ngai pe bakokota, mpo ete nasali mpenza lokola ye.” Nakangami na Yango makasi.

Bamilio ya bato yango batombolaki maboko, balobaki: “Totelemi likolo na Yango!”

Nini? Boyeba mokolo nini tozali kobika, ntango nini tozali kobika, elembo ya ntango oyo tozali kobika kati na yango. Ntango ekoki kokóma mosika koleka ndenge tozali kokanisa. Moko na mikolo oyo, ye oyo azali libanda atikala libanda naino. Ye oyo azali na kati asengeli kozala na kati libela. Ekuke ekokangama.

²¹⁸ Soki moto moko azali awa na ntongo oyo, oyo naino akoti te, oh, na Nkombo na Yesu, balingami na ngai . . .

Botala te moinga ya mosali oyo ateleme awa, oyo atángá te, ayékólá te, akota kelasi te; botala yango te. Kasi botala Liloba oyo ezali kotalisama. Botala Molimo Mosantu na nkembo oyo Azali kotatola Yango ete ezali Solo. Tozali na ntango na mpokwa. Ntango ekómi mosika koleka ndenge bozali kokanisa. Te . . .

²¹⁹ Basi, botika suki na bino ekola. Ndeko mwasi, ólongola bilamba ya salité wana. Bwaka makaya wana. Mpamba te ntango ekoya, oyo: “Moto na mbindo atikala na mbindo naino; pe moyengebeni asala boyengebene naino. Ye oyo azali na kati azali na kati; ye oyo azali libanda azali libanda.” Etikalaki kaka moke: “Soko moyengebeni akobika bobele na mpasi, moto na masumu pe motioli na Nzambe,” moto oyo aboyaka Solo, boyebi, “bakomonana wapi?”

Togumba mitó.

²²⁰ Sikawa, na Pole ya eleko oyo tozali kobika kati na yango sikawa, Pole ya mokolo oyo tozali kobika kati na yango; baninga na ngai ya motuya pe ya bolingo, bino oyo bouti na bituka ndenge na ndenge na mboka mobimba, tika ete sikawa, ngai elongo na bino, na etumbelo oyo, totanga makambo nyonso. Molimo na Nzambe kati na mitema na biso lelo ezali ndenge nini? Bomikanisela, ezali Molimo wana, oyo ezangi ekweli, ezangi mbeba; malakisi nyonso ya lingomba, pe nyonso, esili nye.

²²¹ Bomeka ata moke te, kobakisa likolo na Yango to kolongola uta na Yango. Mpamba te, soki omeki mpenza kobakisela Yango ndimbola na yo moko, likabo na yo elongolami na Buku na Bomoi. Ozali komeka koloba likambo oyo Molimo alobi te? Ozali komeka kosala ete Eyokana lokola nde Elobi likambo? To, ozali kozua Yango mpenza ndenge Elobami, pe kotika Yango bongo? Ozali kobambabamba, kokatakata, kosangisa, kosala makambo oyo elongobani te? Osali yango?

²²² Olobi: “Ee, nazali komiyoka mpenza te ete nakosengela kosala yango. To, mbala mosusu, na—na—nayebi ete losambo na ngai endimaka Yango te. ‘Wana ezali kaka oyo moto moko boye alobi na ntina na Yango.’”

Moto yango moko nde Nzambe. Biblia elobi awa ete osengeli kokata suki na yo te. Baoyo . . .Biblia elobi bongo. “Ekosalema

ete basi bakolata bilamba lokola mibali, pe bakoza mbindo epai na Nzambe.” Ndenge Molimo Mosantu alobaki na nzela na yango, na mbeki na kosokema, oyo abongi te, oyo esalemaki ete azala na eleko oyo Mokonzi monene alobaki: “Lilita na Ngai yango oyo . . . Liloba na Ngai. Lingenda na Ngai yango Oyo, kutu. Kamata Lingenda na Ngai, kende liboso, pe teya Nsango.”

²²³ Nayebi ete bibongiseli bamekaki kopekisa Yango, kotia Yango libanda, kobengana Yango, kobwaka Yango libanda, pe nyonso. Kasi, na ngolu na Nzambe, nazali kokoba mobembo na ngai, koganga ekólo na ekólo, esika na esika, lingomba na lingomba: “Bobima na yango!” Ezali kosepelisa bato te, kasi Ezali Solo.

²²⁴ Bokoyamba Yango kati na—kati na—na Molimo oyo Yango Ekomami? Bokoyamba Yango kati na Molimo oyo Yango Epesami? Soki naino te. . . Esika ezali moke mpo na kobengisa bato na etumbelo; motema na yo nde etumbelo. Ótóbola loboko, loba: “E Nzambe, yokela ngai mawa. Tika ete Molimo na Nzambe ekota kati na ngai, lokola Ezali kotalisa ngai masumu na ngai nyonso, bikweli na ngai, mimesano na ngai nyonso ya mabe, nkanda na ngai, matata, koswana, kotomboka pe nyonso oyo nasila kosala. Pe nayebi likambo moko, ete molimo na ngai ezali na bopolo oyo esengeli mpo na kokende na Lola te. Pesa ngai bopolo, Nkolo, na eleko oyo ya suka. Oyo ekoki kozala liteya ya suka oyo nayoki. Oyo ekoki kozala mbala ya suka oyo nayoki lisusu Nsango. Natomboli loboko na ngai. E Nzambe, yokela ngai mawa.”

²²⁵ Nzambe apambola bino. Maboko ntuku na ntuku. Sikawa, mpo na kopesa bino mwa ntango ya kobondela na kimia. Bino oyo botomboli maboko, etalisi ete ezali naino na litomba mpo na bino. Mpo na ngai ezali komonana lokola nde Molimo ezali kokoba kobenga moto moko.

²²⁶ Nzambe Molingami, Yo nde Oyebi makambo nyonso. Pe Osalaki biloko nyonso na ntina na makambo nyonso, mpamba te, bamosusu basengelaki kokweisama, bamosusu basengelaki kobomama miso; bamosusu, “lokola mosali mbeki oyo asalaki mbeki,” ndenge Polo alobaki, “moko mpo na mosala na lokumu pe mosusu mpo na mosala mpamba.” Oyo esalemaki mpo na mosala mpamba, ezalaki bobele mpo na komonisa oyo esengelaki kopesama lokumu. Kasi bokonzi ezali na maboko ya Mosali mbeki te ete asala oyo Alingi? Ezali mwango na Nzambe te, oyo ebongisama liboso, ete Abenga? “Mpamba te Ayebaki bato na Ye liboso, Abengi pe bango. Baoyo Abengi, Alongisi pe bango. Baoyo Alongisi, Akembisi pe bango.”

²²⁷ Ntango mosusu bamosusu kati na baoyo bazali awa lelo bazali lokola mwasi moke oyo kuna na liziba, bakoti mpenza kati na mbindo, kati na kozanga kondima, kati na mimesano ya bato, na malakisi esalami na bato. Ntango mosusu ezali mbala

ya liboso ete báyóka makambo oyo, kasi eloko moko ekebisi mitema na bango na ndenge ya kokamwa. Maboko ebele, ebele etombwani, Nkolo. Tika ete Mosali monene na mbeki akamata mbeki yango sikawa pe akómisa yango mbeki na lokumu. Nandimi ete ntina ezali, Nkolo, soki te balingaki kosala yango te, balingaki koloba yango te. Nazali kaka kondima, nasimbi makasi mpo na bango.

²²⁸ Tika ete mosali na Yo ya komikitisa azala molobeli, Nkolo. Tika ete tozala balobeli mpo na bango, lokola moto oyo ateleme katikati na bato na bomoi ná bakufi; lokola oyo azalaki molobeli kuna na Sodoma mpo na bato na Sodoma: “Bobima kuna! Bobima kuna, noki!”

²²⁹ Tika ete, Nkolo, na komikitisa pe na bopolo, baya sikawa na ngwende na Nzambe, kati na mitema na bango, báloba: “Yesu, banda lelo, uta sikawa, Okómi ya ngai. Nalaki Yo awa sikawa, ndenge nafandi awa na kiti oyo esika Molimo na Yo esimbi ngai. Soki esimbi ngai awa, nasengeli lisusu kokende mosika te, nasuki awa. Awa nde esika Okutani na ngai; awa nde esika tokokata likambo; awa na kiti oyo ya mibale, kiti ya misato, kiti ya mitano, ata wapi. Awa nde esika likambo ekokatama, mpo ete awa nde esika Okweisi ngai, pe awa nde esika Olaki kosembola yango. Mpamba te ata soki nakozala mbindo pe na bosoto, na koyeisama mpembe lokola matandala. Nakondima Liloba na Yo mobimba. Nabelemi kotambola kati na Yango, kondima Yango, koyamba Yango.

“Pe sikawa nasali boye mpo na nkembo na Nzambe, koyeba ete bomoi na ngai ezali malamau te mpo na ngai, ezali malamau te mpo na Nzambe, ezali malamau te mpo na bazalani na ngai, ezali malamau mpo na eloko mosusu te; ezali malamau bobele mpo na zabolo, ete ákómisa ngai e—eloko ya kosala na yango nyonse oyo alihgi, ya kotambwisa epai na epai, ntango mosusu mpo nákóma eloko ya kosakana oyo mobali moko akobanda kotala, ntango mosusu eloko oyo mwasi moko akolinga mingi. Nzambe, kómisa ngai mosaleli na Yo.” Kokisa yango, Nkolo. Napesi bango epai na Yo sikawa, na Nkombo na Yesu Klisto, Mwana na Yo.

Wana togumbi mitó, ná mitema na biso.

Nazali koyoka Mobikisi na ngai . . .

Na bosembo, moninga. Ekoki kozala mbala na yo ya suka. Ozali koyoka Mongongo moke wana?

. . . kobenga,
Nazali . . .

Eloko nini Azali kobenga . . . Nini ezali kobenga yo, soki nde Mobikisi na yo? Liloba.

. . . Mobikisi azali kobenga,

Osengeli kosala nini? Koboya Mokili.

Pe namema ekulusu na ngai pe nalanda,
nalanda . . .

“Natalaki libatisi ya Nkombo na Yesu mpamba, Nkolo.”

Nakotambola elongo na ye na elanga,
Nakotambola . . .

Elongo na Ye, wapi? Na mai, na elanga, bisika nyonso;
na ndako ya mabondeli, na ebatiselo, bisika nyonso. Zua
mokano yango!

. . .kotambola elongo na Ye na elanga,
Nakotambola elongo na Ye, elongo na Ye kino
na suka.

Nakotambola elongo na Ye kati na
kosambisama, (soki Liloba nde ezali na
elonga to lingomba ezali na elonga),
Nako . . .

“Soki ngai nde nazali na elonga, to Ye azali na elonga.
Lisosoli na ngai ezali na elonga, to Liloba na Ye nde ezali
na elonga?” Ozali na esambiselo sikawa. “Oyo nandimi, ezali
malamu, to Liloba na Ye nde ezali malamu? Nakanisi ete ezali
mabe te kozala na suki mokuse, kolata kupe? Nakanisi ete ezali
mabe te kozala moko kati na ebongiseli?” Alobaki nini?

Nakotambola elongo na Ye, elongo na Ye kino
na suka.

Sikawa esika Akokamba ngai nakolanda,

Ngai pe natomboli maboko, Nkolo. Nkolo, ata wapi, Liteya
oyo elandi esengeli koteyama wapi? Ezali nde awa, lelo na
mpokwa, kuna na Afrika, na Allemagne, na Suisse? Ekozala
wapi, Nkolo?

Epai A . . .(ata esika nini Okokamba,
Nkolo) . . .ngai nakolanda,
Nakotambola elongo na Ye, elongo na Ye kino
na suka.

Sikawa wana bogumbi mitó.

²³⁰ Okolinga kotambola elongo na Ye bisika nyonso Akokamba
yo? Okolinga kotambola elongo na Ye na bantango ya bolembu,
oyo bato bazali konyokola yo, koseka yo, kotiola yo? “Nakokoba
kokangama na Ye. Nakokóba kotambola. Nakokoba kokende
liboso elongo na Yo, Nkolo, bisika nyonso Okozala. Nakotikala
sembo pe ngwi. Kati na móto na etumba, nakotikala sembo pe
ngwi. Soki nakwei, Okotelemisa ngai, Nkolo. ‘Ye oyo abebisi
bomoi na Ye mpo na Ngai akozua yango.’”

Bongo nakotambola elongo na Ye, elongo na Ye
kino . . .

²³¹ Bongo baoyo nyonso bazali na mposa yango, na nse na motema, totombola maboko sikawa, ná mitema na biso, epai na Ye.

Esika Akokamba ngai nakolanda,
Esika Akokamba ngai nakolanda,
Esika Akokamba ngai nakolanda,
Nakotambola elongo na Ye, elongo na Ye kino
na suka.

Akopesa ngai ngolu pe nkembo,
Akopesa ngai . . .

Nkolo Yesu, pemela misuame oyo mpema sikawa. Bikisa babeli pe bato na mawa oyo, Nkolo. Kokisa Yango, Nkolo. Pesa bango lobiko na nzoto, Nkolo, na Nkombo na Yesu.

Pe tambola elongo na ngai, elongo na ngai kino
na suka.

²³² Bomiyoki malamu sikawa? [Losambo balobi: “Amen.”—N.D.E.] Boyoki ete nyonso ebelemi sikawa? [“Amen.”] Soki A . . .

Kelelo na Nkolo ekoyula, pe ntango ekosila,
(ezali Kelelo oyo ya suka, nde)
Pe ntango ntongo na Seko ekotana, na pole pe
kitoko.

Toyemba yango, biso nyonso sikawa. “Ntango Kelelo na Nkolo ekoyula.” Tinda nzembo.

Ntango Kelelo na Nkolo ekoyula, pe ntango
ekosila,
Pe ntongo na Seko ekotana, na pole pe kitoko;
Ntango baoyo babiki uta na mokili
bakoyangana kuna na libongo mosusu,
Ntango bankombo ekobengama kuna na
likolo, nakozala wana.

Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo, nakozala wana.

Na ntongo wana ya pole ezangi mapata, ntango
bakufi kati na Klisto bakosekwa.
Pe bakokabola nkembo ya lisekwa na Ye;
Bongo ntango bomoi nyonso esili nye, pe
mosala na biso na mokili esili,
Pe bankombo ekobengama kuna na likolo,
nakozala wana.

Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo, nakozala wana.

²³³ Totombola maboko, toloba: “Na ngolu na Yo, Nkolo.” Na ngolu na Yo, Nkolo! [Losambo balobi: “Na ngolu na Yo, Nkolo.”—N.D.E.]

Sikawa, tozali bandeko basi pe mibali kati na Klisto. Tobaluka pe topesa mbote na bato oyo bazali pembeni na yo, pe toloba: “Na lisungi na Nzambe, ntango bankombo ekobengama kuna na likolo!”

Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo, nakozala wana.

Tozali kozela nini?

Ntango Kelelo yango (oyo ya suka) . . . Nkolo akoyula, pe ntango ekosi . . .
(Wana tokoti kati na Seko: “Na mwa ntango moke moke, na ntango na kobweta liso.”) . . .
pe kitoko;
Na nsima ntango baoyo babiki uta na mokili bakoyangana kuna na libongo mosusu,
Ntango bankombo ekobengama kuna na
likolo, nakozala wana.

Toyemba yango makasi!

Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo,
Ntango bankombo ekobengama kuna na
likolo, nakozala wana.

²³⁴ Oh, ekozala ntango kitoko, boye te! Mokolo moko, wana tokozala kotambola, pe tala moto moko akobima. “Nani yango? Mama!” Amen! “Ekoumela lisusu te.” Nsima na mwa miniti moke, bobongwani. Pe tokozala . . . tokokutana na bango, na

nsima tokonetolama elongo na bango, mpo na kokutana na Nkolo kati na mopepe. Oh, na mwa ntango moke, na ntango na kobweta liso. Bokoloba: “Tala Ndeko Seward, ndeko mobange oyo azaláká koya awa na losambo! Ee, tala Ndeko DeArk. Tala Ndeko So- . . . Ee, tala awa, bazingi ngai! Likambo nini? Wana na mwa miniti moke. . . Nayebi ete basili mpenza komonana na ngai. Sikawa ekoumela te. Nakobongwama sikawa, na mwa ntango moke, mwa ntango moke.” Oh, iyo! Pe ntango ntongo na Seko ekotana, na pole pe kitoko. Pe mapata nyonso ya kokamwa . . .

²³⁵ Ndenge Alobaki: “Yisalaele, ozalaki pelamoko lipata na ntongo, londende, pe boyengebene na yo ezali solo kolimwa.” Pe ntango nyonso wana ekolimwa kati na Pole ya Mwana, Oyo asimbi nyonso wana, amen, na ntango wana: “Bankombo ekobengama kuna na likolo, nakozala wana.” Malamu.

Kino na mpokwa:

Kino tokokutana! Kino tokokutana!

Toyebi te ntango nini yango ekosalema, baninga. Banda kala, ezalaka lisolo, kasi ezali Solo, pe ekokokisama. Tokómi mpenza na ntango yango sikawa.

Kino—kino tokokutana, kino to . . .

Na Ngolu na Nzambe, tozali kolikia, na ngonga ya nsambo na ndambo lelo na mpokwa.

Nzambe ázala na bino kino tokokutana lisusu.

Totelema sikawa.

²³⁶ Oh, ezali kitoko mingi, boye te? “Oyo nde bisika eleki likolo kati na Klisto Yesu.” Nakoki kozua eloko mosusu na esika na yango te. Boyebi ndenge nalingaka kolóbo pe ndenge nalingaka bokila, mpo ete namonaka Nzambe kuna kati na lisobe. Nalingaka yango. Kasi, oh, nakolinga te kokaba ata miniti na yango moko, mpo na kozua lobiko ya makambo kati na mibu nkama na nkama. Ata miniti na yango moko, kosepela ya boye!

²³⁷ E Nzambe, kela kolamuka kati na ngai. Tika ete nazala kolamuka yango. Tika ete moko na moko kati na biso azala kolamuka yango, kolamuka kati na ngai. Nkolo, sala ete nayoka nzala, Sala ete nayoka mposa. Kela kati na ngai, Nkolo, oyo esengeli kati na ngai. Tika ete, uta na ngonga oyo, náková ya Yo; mosali oyo amipesi koleka, mosali malamau koleka, oyo Opamboli koleka; na makoki koleka, ya komikitisa koleka, ya boboto koleka, oyo alingi mosala koleka; oyo azali kotala mingi makambo na ngambo ya malamau, pe kobosana makambo oyo eleka, pe ngambo mabe ya makambo. Tika ngai nabila kino suka oyo ezali ebiangeli na Klisto. Amen.

Yango nde mposa na biso, boye te? [Losambo balobi: “Amen.”—N.D.E.]

Malamu, tika ete, kino tokokutana na mpokwa, tomema sikawa Nkombo na Yesu, moko na moko na bino sikawa.

Mema—mema Nkombo na Yesu,
Mwana na mawa pe bolozi;
Ekopesa yo esengo pe libondisi;
Mema Yango bisika nyonso okokende.

Nkombo kitoko, O ya boboto!
Elikia ya mokili pe esengo ya Lola;
Nkombo kitoko, O ya boboto!
Elikia ya mokili pe esengo ya Lola;

Sikawa togumba mitó.

Mema Nkombo na Yesu,
Lokola nguba liboso na mitambo nyonso;
Wana masenginya mazingi yo . . .



KOYEBA MOKOLO NA BINO PE NSANGO NA YANGO LIN64-0726M
(Recognizing Your Day And Its Message)

Liteya oyo ya Ndeko William Marrion Branham, eteyamaki liboso na Ngelesa mokolo mwa lomingo na ntongo, mokolo mwa 26, sanza ya nsambo na mobu 1964, na Branham Tabernacle na Jeffersonville, Indiana, U.S.A., ekamatamaki uta na bande pe ekomamaki na mobimba na yango na Ngelesa. Ndimbola oyo ya Lingala ekomami pe ekabolami na Voice Of God Recordings.

LINGALA

©2015 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Liyebisi ya makoki ya mokolo-eloko

Makoki nyonso ekopesama na ndingisa. Búku oyo, ekoki kozala imprimé na masíni ya ndako mpo na yo moko to kokabama, ofelé, lokola esalelo mpo na kopalanganisa Nsango Malamu ya Yesu Klisto. Búku oyo ekoki kotekama te, koyíkanisama te, kotiana na site internet te, kobombama mpo na kolukaluka te, kolimbolama na nkota mosusu te, to kosalela yango mpo na kosenga misolo te, kozanga ndingisa ekomami mpenza na Voice Of God Recordings®.

Soki olingi koyeba makambo mosusu to kozua bisalelo mosusu, komélá:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org